

桃源縣志

增繪民國城鎮
鄉圖共二十本



仕蹟

士君子出柄尺寸動曰爲宗族交遊光其屏營夙夜與設施於
朝野上下從可想耳願上元開闢人才眾矣其間闖茸握齷由
守令倖致卿貳不無置所職不問徒爲胭脂膏飽妻子計者而
國而忘家公而忘私無論躋臺鼎參密勿卽一邑一官亦必勞
心撫字俾編戶歌來暮而勒去思古今正不乏人也舊志稱邑
士無宦情杜門卻軌似仍黃綺高風及載稽先達中文治武畧
或以清慎或以慧直或以忠勇或以循良或以慷慨愿慤重當
時而照耀簡冊自勝國洎今肩駢踵屬餘烈每蒸蒸日上艾詎見
聞異辭抑 聖明在上有所感激而然與昔昌黎謂韓約奏
課第一宋哲宗倚張頴外臺重任蓋仕蹟著邑人尙矣茲謹第
事實冠諸傳首則夫矜式後賢崛起來哲豈越寸楮內外耶

蜀漢

廖立字公淵武陵臨沅人劉備領荊州牧辟爲從事年未三十擢長沙太守諸葛亮鎮荊州孫權遣使通好於亮因問士人誰相經緯者亮答曰龐統廖立楚之良材當贊興事業者也建安二十年權遣呂蒙襲南三郡立脫身走自歸備備素識待之不深責也以爲巴郡太守二十四年備爲漢中王徵立爲侍中後主襲位徙長水校尉立本意自謂才名宜爲諸葛之貳而更游散在李嚴等下常懷怏怏後丞相掾李邵蔣琬至立計曰軍當遠出卿諸人好諦其事昔先主不取漢中乃走與吳人爭南郡卒至以南三郡與吳人徒勞役吏士爲無益而還旣亡漢中夏侯淵張郃深入於巴幾喪益州後至漢中使關侯身死無子遺上庸復敗徒失一方是羽怙恃勇名作軍無法直以意突耳故

前後數喪師眾也如向朗文恭凡俗之人耳恭作治中無綱紀
朗昔奉馬良兄弟謂爲聖人今作長吏素能合道中郎郭演長
從人者耳不足與經大事而作侍中今弱世也欲任此三人爲
不然也王連流俗苟作掎克使百姓疲敝以至今日郤琬具白
其言於亮亮表立曰長水校尉坐自貴大臧否羣士公言國家
不任賢達而任俗吏又言萬人率者皆小子也誹謗先帝疵毀
眾臣人有言國家兵眾簡練部伍分明者立舉頭視屋憤叱作
色曰何足言凡如是者不可勝數羊之亂羣猶能爲害况立托
在大位中人以下識真僞耶於是廢立爲民徙汶山郡立躬率
妻子耕殖自守聞諸葛亮卒立垂泣歎曰吾終爲左衽矣後監
軍姜維率偏軍經汶山往詣立稱立意氣不衰言論自若立遂
終於徙所妻子還蜀

蜀志 按蜀志以爲臨沅人當時桃源半屬臨沅又廖氏譜稱宅有丹砂井楊慎丹

鉛錄上有溫泉下有丹砂今溫泉在桃源縣北百二十里則廖氏舊居在桃矣至武陵胭脂泉不足當丹砂并府志已辨之史懷曰廖立指切蜀事愿悉蜀用事之入與失事之狀皆中痛癢不為無識而語語犯忌武侯稍抑之未為不是而表劾之語似屬護短甚矣聽言容物之不易也立被廢後自處不苟躬率妻子耕植自守不失反己思過之義武侯沒而垂泣若以虛公誠恕推諸葛亮於身後者實是武侯知已觀武侯處彭美廖立李嚴皆未盡善而立為甚楚寶曰廖立負名使氣不能忍耐臧否近於誹怨非才之善藏者也然當其遠徙汶山耕植自守聞亮既卒垂涕與思矯然異夫李嚴彭美之所為是真能自行其胸臆者豈亮之用法果有以致之乎吾故不取於習氏之言

唐

韓

約朗州武陵人本名重華志勇決略涉書有吏幹歷兩池權

鹽使虔州刺史交趾叛領安南都護再遷太府卿太和九年代

崔鄩為左金吾衛大將軍居四日記事約繇錢穀進更安南富

餘地聚貲尤多唐書本傳元和中振武軍機宰相李絳請開營田可

省度支漕運既絕和糴欺隱憲宗通鑑善乃以重華為振武京西

營田和糴水運使起代北墾田三百頃出贓罪吏九百餘人給
以來耜耕牛假種糧使償所負粟二歲大熟因募人爲十五屯
每屯百三十人人耕百畝就高爲堡東起振武西逾雲州極中
受降城凡六百餘里列柵二十四墾田三千八百餘里歲收粟
二十萬石省度支錢二千餘萬緡重華入朝奏請益開田五千
頃法用人七千可以盡給五城會李絳已罷後宰相持其議而
止唐書食貨志又韓愈送水陸運使韓侍郎歸治所序稱其前領三
縣紀綱二州奏課當爲天下第一行其計於邊其功烈又赫赫
若此唐詩桃源皆稱武陵縣今依通志臨湘瀏陽並載徐氏八龍之例存之

五代

周行逢武陵人也與王進逵俱爲靜江軍卒事馬希萼爲軍校唐
遺邊鎬入楚爲武安節度使遷馬氏於金陵行逢及進逵爲武

平畱後劉言謀攻邊鎬行逢別破益陽殺李景兵二千餘人擒
其將李建期進遠趨長沙邊鎬棄城走劉言盡復馬氏嶺北故
地乃上表於周請貢獻廣順三年以言爲武平節度使進遠爲
武安軍節度使行逢爲武安行軍司馬尋進遠以隙上表於周
誣言欲降唐幽之別館請移使府治潭州周從之遂襲殺言顯
德元年拜行逢武清軍節度使權知潭州軍府事三年岳州團
練使潘叔嗣殺進遠或勸據朗州叔嗣曰吾殺進遠救死而已
朗州非吾利也乃還岳州遣將李簡率武陵人迎行逢於潭州
行逢至或請以潭與叔嗣行逢曰叔嗣殺主帥罪當死以其迎
我未忍殺爾若與潭州是吾使之殺王公也召爲行軍司馬叔
嗣稱疾不里行逢怒曰是又欲殺我矣乃陽以武安節鉞與之
召使至府受命旣至數其罪而斬之自稱武平畱後奉表於周

七月世宗乃授行逢大都督武平軍節度制置武安靜江等州
軍事兼侍中盡有湖南之地宋初加兼中書令行逢在鎮盡心
爲治儉約自勉辟署官屬必取廉介之士有女婿求補吏不許
返給以耒耜語之曰吏所以治民也汝才不能任職豈敢私與
以祿耶姑歸墾田以自活其公不多此類條教簡約民皆悅之
建隆三年卒子保權降於宋五代史朱子綱目云周行逢
宋史世家雷心民事悉除馬氏
橫賦貪吏猾民爲民害者皆去之擇廉平吏爲刺史縣令又湖
南大飢行逢開倉以賑之全活甚眾行逢自奉甚薄或譏其太
儉行逢曰馬氏父子窮奢極靡不恤
百姓今子孫乞食於人文足效乎

宋

張顒字伯印頡兒慶曆六年丙戌進士才幹爲時所稱歷都官員
外郎工吟詠與梅聖俞友善其集世無傳本光緒年桃洞土人
得斷碣於塌岸下某湍沙泥視之則係顒和聖俞桃源七古雄

俊幽深無宋人習氣而鄉先達全豹一斑竟幸窺於數百年後亦元豐人獲工部鮫室圍青草龍堆隱白沙石刻詩於洞庭湖

中類也崇祀鄉賢祠

梅聖俞詩序希
仙人邑里集

張頡字仲舉其先金陵人徙鼎州桃源皇祐元年己丑進士調江陵推官歲旱飢朝廷遣使安撫頡條獻十事活數萬人知益陽縣縣接梅山溪崗多蠻獠出沒頡按禁地約束召獠人耕墾上其事不報累遷開封府判官提點山西刑獄廣東轉運使熙甯中章惇取江南地建沅懿等州克梅山與楊光潛爲敵頡居憂於鼎移書朝貴言江南殺戮過甚無辜者十八九浮屍蔽江民不食魚者數月惇疾其說欲分功啖之乃言曰頡昔令益陽首建梅山之議今日成功權輿於頡召賜緡三百匹尋擢江淮制置發運副使改知荆南復徙廣西轉運使時建廣源爲順州將

城之頡謂無益朝廷從其議坐掉罵參軍沈棟罷未幾以直集
賢院知齊滄二州進直龍圖閣知貴州入覲帝首言鄉者論順
州不可守信然時有獻言者謂海南黎人陳被蓋五洞酋領異
時盛強且爲中國患今請出兵自效宜有以撫納之命頡處其
事頡使一介往呼之出補以牙校喜而去詔問何賞之薄對曰
荒徼蠻蜚無他覲得是足矣尋罷兵海外訖無事久之轉運使
馬默劾其經理宜州蠻事失宜罷職知均州哲宗立還故職知
鳳翔廣州召爲戶部侍郎不報踰年以寶文閣待制出爲河北
都轉運使勅曰河決累年隄防未立西山諸水汗漫無歸屬此
秋霖鞠爲汙澤朕北顧之念寤寐不忘雖振廩已行而宿麥未
廣欲使斯民無艱食流亡之患要在使者有愛人惻怛之誠爾
河北都轉運使張頡蚤分刺舉之權旋委方州之重以勤勞久

次之選居出納有部之繁趙魏之優宜任其責農桑之政勉盡

所宜特加延英之華以重外臺之寄耳旋徙知瀛州湖北溪貉

畔朝廷託頡素望復徙知荆南至都門暴卒崇祀鄉賢宋史 郎紹興

十八年戊辰科張頡以左朝請大夫監尚書六部門兼以尚書兵部員外郎充點檢試卷言皇帝御集英殿唱名賜狀元王佐

以下及第出身三百三十人釋褐朱熹中第三甲第九十名省志題名錄

劉子澄號玉淵邑之欽山人官永州監簿紹定間持檄過龍陽修

香積寺築九疑書舍於永州高士巖永州層巖有涪佑丙午石

刻詩通志 宋史劉清之字子澄卒於光崇時此在紹定涪佑間知別為一人也

元

元光祖邑人舉鄉魁選授茶陵州同知以廉能著擢廣西道副都

元帥所在多惠政崇祀鄉賢舊通志

明

謝受五派名文彬元至正十五年隨開平王拔采石保右軍都督
指揮同知洪武初官常德衛後解組遷桃葬縣治東關外會仙

橋魏燦
向榜採

賈煥洪武中知醴陵縣敷治寬平尤盡心民事作興學校邑中廢

墜皆次第就理舊府志

劉江洪武中任燕山中護衛百戶靖難兵起累立戰功進中府都

督通志

倪永壽永樂辛卯鄉薦入監授貴州鎮甯知州地雜軍彝永壽性

和易以德政綏懷不事煩苛教民務豐力本民懷其惠請祀名

宦又入邑鄉賢祠廖道南贊曰奉職司牧教授民時贊君宣化

祇若敷施盧李卓倪最績咸熙倪即永壽舊志參
楚紀

田鐸字徇伯偕弟清鍵戶僧寮讀書積數年聞父疾始歸鐸中丞

樂辛卯舉人補鳳陽衛經歷清字齊伯永樂歲貢由龍虎衛經
歷升長樂知縣居官廉惠著荆堂倡和集

文澍字汝霖以軍籍中天順己卯科雲南鄉試舉人登成化丙戌
進士授南京刑部主事歷郎中出補四川重慶府政尙寬平有
古循吏風歲飢請米萬石賑活甚眾有劇盜嘯聚山林諭之使
復業盜服其誠信隨解散以與監司齟齬調貴州思南府遂告
休澍博學爲詩文古淡有思致年躋耄耋手不釋卷居鄉以禮
法自律爲士類所欽與王陽明友善陽明謫龍場驛特過其廬

訪之及沒爲誌其墓祀鄉賢

舊志參
楚紀

李顯字榮宗號南坡成化甲辰進士授戶部主事監課崇文門及
督京倉慎清著聞改南京考功郎補南康知府以惠愛稱修復
白鹿書院申朱子條規作興士類年五十引疾歸祀南康名宦

及邑鄉賢祠廖道南贊曰有官守者孰曰盡職有言責者孰曰盡忠程李趙羅明試以庸李即公也

明統志
參楚統

張世用貢生任山海丞疏奏准設新店遞運所邑民德之祀鄉賢

祠舊志

吳聰成化歲貢遊太學授江西進賢主簿時邑中邊糧運米灘險壞舟不堪賠累上疏奏准折色著為定令進賢至今賴之祀鄉

賢祠賀奇
府志

印偉宏治甲子舉人成都府通判有治劇才工詩翰歸老林下汲引後進時論高之子榮嘉靖貢生工詞賦任江南通州州判以征倭寇功升鳳陽府通判有政績兩郡立生祠祀之

舊志

蘇顯字文明號安溪初以歲貢肄業南監事竣惟餘六日適繼母訃至家人欲匿之俾得卒事顯聞之即日發喪中宏治戊午應

天鄉試舉人授儀真教諭端範造士歲荒捐俸賑士之貧者升
青陽知縣數月入覲乞休家居勵節守正不見有司不侵鄉里
有古君子遺風崇祀鄉賢

舊志

李冕歲貢生剛直練達授江甯主簿詢民間利病條陳十餘事論
馬政尤切時弊當事採著爲令釋冤囚八人革糧里各役耗費

江甯德之病卒櫬歸行李蕭然

通志

唐祺正德貢生雲南臨安府同知持身清介蒞任三年值蠻變屢
有戰功以引年歸足不履城市結廬漁溪上環堵蕭然子崇文
大理府通判蒞官六月以丁憂歸持身有道蓋克濟其美云

舊志

參楚
風補

李徵字誠之號源楚冕子少穎悟勤學不倦工詩古文登嘉靖壬
辰科進士初任行人選刑科給事中歷戶禮部吏部給事出

爲江西按察司副使分巡瑞州賑活飢民甚眾升浙江布政司
參政旋簡按察使禁迎春觀潮陋習時緝海賊出無辜者數百
人浙民懷思不替轉江西布政使時嚴嵩父子奪民居爲瑩院
司俱左袒獨徵持不可嵩遂銜之喉言官論罷歸捐俸置義田
三百畝以贍鄉族於縣東建漳江書院造就邑人士卒之日橐
無遺金著有元光詩文稿閒閒亭錄徵從子相辛卯同榜舉人

工詩文未仕

通志參
縣志

吳興嘉靖貢生大邑知縣居官清正九年任滿歸百姓攀轅不忍

置

舊志

李位嘉靖辛卯舉人績溪知縣有惠政績溪民祀之以才忤時貴

改廬州教授

舊志

鍾萬鎰字子韞嘉靖丁酉鄉薦知安陽縣有政聲丁難服闋大學

士郭樸爲梓里乞舊令仍補安陽政成擢南戶部立徵收善法

河南人德之見倉官擬成者眾詢之以耗累對爲白於大司徒

曰國初耗倉之役原置不問今奈何以鼠罪人乎竟奏釋諸成

者弟萬殊中嘉靖辛酉順天鄉試固原州知州舊志按安陽志載萬鑑乃江

南桃源人考舊志萬鑑鴉鳩村人有弟萬殊則爲邑人無疑矣

李玉嘉靖貢士璧山主簿李徵誌其墓曰負才敏練世務璧新設

縣緝盜賑荒綽多善政致仕後林下詩酒自娛不計田舍人服

其高舊志

杜祉嘉靖貢生授羅城縣丞平易近人不事苛刻以治行升荔坡

知縣舊志

胡志正由貢生授狄道知縣九年升秦州知州致仕不事謁請不

乘輿馬儉素如寒士鄉人稱之舊志

丁乾嘉靖庚子舉人星子縣教諭升猷縣知縣以疾改蘇州府教
授政學兼長惜未竟其志

舊志

劉璣字客泉嘉靖貢生中順天丙午鄉試任嘉興府通判爲政清
慎勤廉數年治聲卓著卒於官士民賻贈歸櫬葬縣南萊蘿坪
邑人江西布政使李徵題墓祀鄉賢

江盈科字進之號涿蘿少甘貧推祖父田以與昆弟授徒自給除
夕自郡歸道逢失金赴水者傾所攜贈之登萬曆壬辰進士授
長洲令縣苦京解諸役盈科爲置田二千餘畝以資役費比賦
勾校每寬其扑曰吾不忍見傷肌膚之校也六年政簡刑清循
聲徧江左戊戌內擢吏部考功主事數上書陳時政其宦寺一
疏慷慨激切摘發無遺與楊椒山劾嚴相楊大洪劾魏璫兩疏
並重一時旋轉戶曹以征賦不及格改大理寺正辛丑奉命恤

刑滇黔大獄為平反者三百餘人癸卯主試蜀中受特命為提
 學僉事頃卒於蜀生平湛於經術尤留心時務如用兵慮其嗜
 殺也邊徼防其失際也讞鞠懲其鍛鍊也則以叢談中武功西
 南冤獄諸篇規諷當路天才俊逸所為詩文與袁中郎力主清
 新用矯七子模擬之弊嘗言李空同文筆古拙七言古風逼真
 杜陵何大復詩文庶幾雙美而挺拔絕特已遜古人王元美終
 當以文冠世李于鱗之文初讀作苦久而思索得出令人欠伸
 詩則雄詞凌駕傲睨惡道蓋兩失者持論如此故當時轉移風
 氣海內至以江袁並稱著有易經解雪濤閣集明臣小傳十六
 種雪濤叢談詩評閨秀詩評皆有深婉之致崇祀鄉賢

一統志
 參雪濤

閣集及叢
 談詩評

于宏萬歷選貢出順天甲午鄉薦選四川西充知縣丁母艱起復

補北直隸興濟縣歷升陝西平涼府同知慶遠府知府以平土
司功升廣西左江道副使兼右參議子士元萬歷乙卯舉人廣
西賓州知州士譽字永叔號馬石天啟乙丑進士初任臨川縣
知縣歷升九江府推官工部都水司主事湖州府知府性寬平
和易所至稱之

舊志

羅名臣字賓叔由選貢中順天鄉試選璧山知縣以乞養告歸有
治兵才時闖賊偽設任孟二渠盤踞澧州屢犯縣境名臣團練
九溪諸鎮與向日昇羅其鼎劉希儒等合圍澧州賊騎宵遁後
獻賊全營破郡設偽令佐貳等官名臣聯絡各團約戰賊尋遁
去明末仕夔巫監軍道

舊志

印司奇字易菴號雪浪峭直廉介不爲物下中崇正辛未進士授
南京兵部車駕司主事遷員外郎南京吏部尙書謝陞奉召掌

北銓司奇以新例裁其駟卒陞儼夫以行微辭讓之南都僚屬
送陞祖道司奇獨不往陞顧重之尋除鎮江知府溫體仁欲陷
瞿式耜陰遣人至蘇募無賴子張從儒誣式耜與錢謙益結為
死友侵國帑謗朝廷危社稷擊登聞鼓疏達下所司按問江南
巡撫張國維檄蘇松鎮三府會訊司奇力持誣狀國維以上聞
體仁固欲重陷式耜死調嚴旨切責司奇坐鑄級已而與推官
雷起劍交惡國維右起劍交訟於庭謝陞已拜大學士當擬旨
知司奇抗直黜起劍而司奇降論送歸里其自鎮江歸也囊無
十金清名甲於江表後唐王擢司奇兵部侍郎僉都御史協理
院事闖陷走歸里大兵破辰常司奇棄家南走崎嶇苗獠間馬
進忠津送之永曆四年秋至桂林瞿式耜奏司奇清節舊臣間
關依主宜即召用乃擢通政使特勅召見未赴客寓草菴中與

金堡同居桂林陷司奇遂與堡除髮爲僧司奇不喜習浮屠法

遂反湖北隱焉見永歷實錄

關士琦字褐公爲諸生時文名噪甚有才子之目崇正甲戌進士

陳情養母以部檄屢促授南安令丁內艱服闋赴京方抵維揚

遇悍兵強易其舟歎曰時事如此尙復何爲遂歸福王建號南

都時以物望題授翰林院檢討卒不出虛衷獎掖後進有古人

風著有桃源索隱捕鯉亭草課兒擲果篇螭蜺館集郊廟博議

理學同異理學無同異參同契金剛經註疏等書舊志

羅其鼎字耳臣號月江讀書目數行下爲文下筆千言有幹濟才

以忠義自許崇正庚午鄉試因故未預錄科方伯杜友白震其

名特薦入闈時號舍已盈命別設几案題下其鼎七藝一揮而

就遂舉於鄉後十年成進士因父年八十餘疏辭歸里李自成

陷京師也其鼎聞報哀號大慟曰李逆凶悖於北張賊蹂躪於南仗義謀恢復者當四方起生靈塗炭曷有甯日哉是年仲冬服闋赴金陵感憤疏陳大勢請縞素倡義不報明年授行人司行人奉命冊封遼藩正治行間大兵下南都其鼎謂全局雖裂偏安可圖乃間關就何騰蛟於長沙請爲掎角糾合沅澧諸堡旣歸疾作屬其子人琮固常澧以通滇黔爲長沙聲援且言其鼎非畏死也豈有他慮獨國家破壞難收九泉猶有餘憾遂卒時明督臣楊鶚以贖寓書其子曰令先公國之柱石遽遺泰山梁木之感鶚忝封疆重寄不能一預哭泣所有薄儀幸酌明水代薦之世事傾危梓里亦費綢繆貴縣一帶當設防者設防當掘斷者掘斷毋令一騎可越一卒可度惟足下善成尊先公之志其爲當時傾嚮倚重如此著有月江仙掌焚餘諸集

朝康熙二十年

予記鄉賢

舊志卷最
古園集

羅人琮行人其鼎子字宗玉號紫蘿十歲能文有神童目順治十
八年辛丑進士除浙江甯波府推官康熙丁未裁各路推官改
人琮陝西朝邑知縣先後詳免災糧四千有奇訟無留獄囹圄
一空在任七年黃河安瀾飛鴉逐蝗麥穗四歧朝民駭爲三異
戴以青天循聲遂騰於西北十二年吳三桂反滇黔十三年春
總督部堂鄂奏調人琮軍前

聖祖以陝西官員料理糧

餉供應兵馬亦屬緊要未蒙

俞允五月陝西巡撫統陝甘

總督哈交章薦人琮才能而平涼總兵王輔臣叛應三桂陝西
全省騷動人琮內撫百姓外支軍需並詳請撤回協馬申明三
河塘期及收山西協餉議止貯餉寺觀空房事宜兩省官民便

之十五年奉

旨以御史用引見

乾清宮門十七年補

四川道監察御史奉

旨巡視北城歷陳正官方修明史舉

遺才籌鼓鑄禁派火耗銀請蠲湖南錢糧諸疏多蒙

嘉納

十八年京師地震

詔求直言人琮劾江南臬司崔維雅

第一貪酷維雅坐革職提問反出偽書誣人琮四年漸烏有之

事十九年奉

上諭傳送人琮刑部著章京一人披甲五人

守取口供臨去職時奏免會場兵丁設柵攔錢市塵倒斃株累

及點卯規費至今賴之人琮被逮日以棋酒自娛賓客繹絡問

候或戒人琮笑曰生死自在君父圖棋賭酒何與罪案總

憲魏象樞重之有真御史之目六月免官去都餞送載道歸泊

揚州儀真河友人李錦言張瑞生刻有冤揭可取以實彈章而

重維雅之科人琮曰曩劾維雅在職故也今

聖上幸賜骸

骨矣取此何爲自後家居眺詠不復與聞天下事四十三年湖
廣總督喻武功成龍謂人琮驄威霜肅林養風高誠鄉國之儀
型廊廟之峻望也爰題地上神仙匾檄邑令導鼓樂躬致之閭
壽八十八歲卒祀鄉賢祠著有最古園集二十四卷二編十八

卷三編十一卷尚政節錄十卷

一統志
恭年譜

李國盛字偉臣康熙十九年吳逆餘黨未靖國盛以致仕守備充
將軍蔡毓榮先鋒先登陷陣攻下辰龍關爲礮石碎其右膝敘
功贈武德將軍尋以創重卒

湖南
通志

李彪白字朴子訓子順治丁酉舉人辛丑會試中明通榜任陝西
涇源令治尙寬恕民有慈母之稱尤究心掌故手抄邑乘康熙
三十四年知縣汪虬邑人羅人琮纂修邑志悉取資焉

續縣
志

楊震生字又起由選貢知漳平縣民有以積逋久繫獄中者悉捐

林湖縣志 卷之八
俸代償之鎮兵倚勢踞民房懲之如法擢知德州卒於官

舊志

文鵠字月林穎悟博學少時以試義通五經補諸生攻苦刻勵三
中副車老得歲薦司鐸永興學以主敬行恕爲己謹獨爲要每
舉素所服膺與學者相勉正以率物鄉黨畏化有王彥方之目
生平著作最富兵燹遺失惟進呈 太和殿告成賀表膾炙

士林崇祀鄉賢

舊志參
通志

文志鯨訓導鵠子字跋浪號石濤又號木村生有異表膽識過人
明季多寇其父攜避安化之茶洞適外樵蘇有虎以兩爪與戲
志鯨無懼容康熙丁卯舉於鄉辛未成進士時總裁大學士張
京江司馬李安溪得其卷皆擊節稱奇後 高宗純皇帝欽

定本朝制義是科與選者張蘧若陳滄洲外惟志鯨而已及居
詞垣杜門卻執持了凡功過格晝行夜書己卯典試山右務搜

積學士竿牘絕無所入會直省弊發

聖祖益重志鯨庚

辰夏 召赴暢春園 命作

皇太后萬壽無疆賦

御書克食壬午冬入直 南書房

上常遣內侍傳 諭獎

志鯨聲望學問 命作冬雪詩

召近 御榻背大學

堯典太極西銘 賜宸翰朱子克己詩一幅舊例直省學差

翰詹科道皆由保舉癸未志鯨奉 特命督學兩浙誠異

數也及抵嘉禾供張繁侈趣撤去諭生童去華返樸先行後文

甄拔若錢司寇主敬邵中丞學址年未成童皆目為大器伏滄

注嘗稱其公明如天空雲淨然為貴顯不得行私者誣奏撤回

來 京乙酉若輩排擠外轉 上亦欲志鯨習親民事得

邠州邠羣山環列東接函谷西通玉門徵賦重煩梳爬櫛比苦

無休息到任釐剔淨盡匝旬丁內艱去父老攀臥志鯨亦欷歔

淚下賦邠州留題十章志慨丁亥服闋改四川補用庚寅刺瀘
州奸吏豪蠹望風遁積年大案立與平反受事甫四閱月循例
入覲 上動容云文志鯨在浙做官好州牧非爾職著復

翰林原銜食俸五品壬辰晉左春坊左中允秋晉日講官起居
注充子史精華館總裁是科進士始留教習 特命為館

師多方啟迪標先儒格言為學的一立志二主敬三窮理四反
躬隨奏 欽定教士章程 聖祖自熱河回鑾帶領

所教進士迎 蹕 上問學行優者幾人志鯨引吳翊李
登瀛查雲標應朝昌等進 上舉吾與點也問朝昌是何

氣象昌奏便是堯舜氣象 聖祖緩控大笑癸巳恭逢

萬壽恩科

命志鯨與張鵬副同主順天鄉試協衷搜羅始終一
節故得人最盛忌者緣儲位未定因首題克己復禮三句揭一

日復天下歸之飛語於九門上干

宸巖志鯨從容奏云題

是臣與張鵬翮同眾房考云擬至捻筆圈出獨係臣手

天顏頽霽尋授鴻臚寺卿

召見養心殿

問河洛異同

及志鯨年數有別圖大用之

諭甲午典試粵西假道省墓

至執仲兄侶樵手怡怡終日不忍釋復

命擢奉天府丞乙

未春大理卿朱軾升補府尹

聖祖諭爾往奉天凡事須

商文志鯨故高安諸務必就訪酌而志鯨亦歎其有宰相度戊

戌冬吏部擬遷通政司

聖祖折本又擬除僉都御史復

折本及奉天府尹缺出遂特

旨授志鯨府尹下僚餽遺

悉屏拒之微飭存七借三之宜實換票加耗之宜革羅補倉斛

之宜平歲終盤查之宜清五部會推事件無旗漢皆虛公鞠訊

思得其情辛丑恭祝

萬壽畢卽以微疾乞

允歸田尋

卒享年七十歲生平爲人慷慨廉介內外斬斬勇於有爲易贊
時猶口誦一夕尙存此志不容少懈待子弟甚嚴恆言功名富
貴自有定數父兄教子弟原不爲此性惡矜露選家請梓其文
輒遜謝凡行己處事自讀書至居官蓋無不可告人者既卒資
士民贈賻乃得歸櫬雍正三年奉 旨祀鄉賢祠參楊名時
所撰墓志

及黃叔
琳傳

文宗伊字尹孚由選貢任高唐州判有惠政

通志

文曙字東寅鴻孫康熙癸巳鄉薦知四川峨眉縣創建書院於桐
坪捐俸修石梁築壩陵堰民皆以文公名之邑歸化鄉係苗民
內附地賦稅一千餘兩向由縣差親丁同武弁徵收謂之馬價
錢每正賦一兩有耗費至二三兩者曙惻然謂彼既歸化均屬
赤子安忍異視爲詳請大部馬價遂改爲條糧乾隆二年膺卓

異入覲得

溫旨賜蟒服以直隸知州擢用因老乞歸著有

霽雪樓詩集眉人請祀名宦

府志參四
川通志

羅天純字太清人琮季子生而穎異年十一籍諸生十五食餼父

寢疾侍湯藥衣不解帶父沒廬墓三年不飲酒茹葷雍正癸卯

有司舉孝廉方正力辭己酉由歲貢保舉習工部製造庫學習

行走有點吏私扣匠作工食輒繩以法尋授屯田司主事仍兼

攝製造庫事卒於官無以為殮同官購歸其櫬

通志

萬崑字中一雍正丁未武進士授甘州營遊擊西酋逆命運駝馬

度流沙塞外苦寒士馬多損耗崑所部獨完因事左遷補廬州

衛守備廬水湍汎為修闢以緩其流設藥材棺櫬局以濟貧乏

郡人有惠逮淮南之頌擢綏德營都司以老疾歸

參府志

郭愈忠字心一雍正庚戌武進士授貴州清江協右營守備柳州

本流集記
苗叛從征三載遷柳州城守營都司訓練有方軍民懷之後調
江西龍泉營都司卒於官長子用仁武舉次子用儀廣西透州
巡檢

陳熹字蔚文號石圃好學善詩雍正壬子鄉舉乾隆丁巳中明通
榜授邵陽教諭重修濂溪書院捐田租給膏火截取知天台縣
高宗皇帝南巡各大吏交章薦其才幹乃令彈壓台郡六屬所至多惠
政旋因不附貴顯坐他故左遷回籍起復補蘇州府知事以老

乞歸著有石圃詩集洞鄉草

參府志

向上達字成章貢生性高雅爲文有正嘉遺則築室豐和山北
之小卯谷顏曰樂亭因以自號歲暮積雪糧輒絕臥梅花廡下
讀周易怡然不輟乾隆二十九年授嘉禾縣教諭在任二年以
廉靜寡欲訓士卒於官櫬歸門人皆哭送之著有樂亭文集倉

禾士箴

謝如式字孝徵號桂山少孤貧事母孝敦品力學領乾隆丙辰鄉

薦宰光化歲大歉民至食樹皮鬻子女式設法保全之有兄弟

爭產者式為講棠棣詩遂各感泣而釋歷任五載未決一囚未

刺一配士庶咸稱仁廉致仕後家無蓄金以授徒為生計年七

十八卒著有性理論或問語類講粵遊篇燕山草

府志志奉行狀

文體端字履初廩貢生志鯨季子勵品敦行能世其學乾隆元年

詔舉孝廉方正科當事者極力推薦赴

都試

賜六品頂戴

選授長沙府教授訓迪士子宗真西山諭潭州學者說謹持人

己嚴辨義利風範皆如其父云

舉人陳楷禮採

萬岱字東瞻號雲亭崑弟乾隆丙辰二甲第一名武進士由遊擊

歷轉陝西興漢鎮總兵解巴里坤馬匹領長吉羅克倫等處屯

兆原

人物志上

仕蹟

田二十五年漢土官兵搜巴里坤隨帶纏頭回同北撤入山禽
賊數百人獲騾馬輜重無算哈拉薩喀禽賊一次旋赴烏魯木
齊總理駝馬糧餉解阿克蘇馬拊循士卒著績邊陲年五十八

歲卒於官

萬氏譜
參府志

郭璞字完太號峰山乾隆丙辰武進士

殿試授二等侍衛三

年授陝西延綏協都司八年夏以救城門火功遷甘肅玉泉營
遊擊十二年調永安遊擊十六年奉

旨速巡撫鴉里克達

對簿調護惟謹時爲溫語安之不至自盡

上嘉之遷鎮番

營參將二十五年秋哈密金厥夫丁變璞偵得實乘間殲其魁

盡燔各岩柵

賞戴花翎遷哈密協副將二十九年從征巴

里坤逾年璞奮然請提本標精兵三千人直搗山峽破數岩獲

酋長滿立檻送京師

召見

賞賚有加授涼州鎮掛印

總兵尋署甘肅提督二十六年冬以卓異入覲得溫旨

初璞從勦巴里坤遇劇賊連戰兩日夜未食得心病不瘳至是

乞歸上不許請假半載歸卒於途年六十歲葬邑南銅

仁舖

萬魏字陟山乾隆丁巳武進士二等花翎侍衛授江南壽春遊擊

擢六安參將因兵與回民鬪應劾備弁數十員有為魏謀者曰

速詳出兵以禽之否則累及矣魏曰詳則害諸官禽則傷眾命

某願以身當之遂被劾接駕行在蒙恩開復魏竟不

復仕參萬氏譜

胡以泰字大來由歲貢授福建永春州州同兼攝崇安縣事斷獄

平允庭無留牘崇民彭士彪與姪大魁爭訟九載以泰諭以各

保身家訟遂寢以疾告歸士民為之格石銘恩通志參行狀

彭俊字公顛郡庠生援例授河南通判秉性廉毅訊諸疑案多所
平反時有潘姓女許字王某潘嫌王貧改字鍾某俊廉問得實
嚴其罰捐俸五十金子王完姻王尋補博士弟子員梁人尸祝
之舊志

于公裔字自遠乾隆戊午鄉薦中明通榜授藍山縣教諭邑大歉
請縣均糶人被其惠弟公懷公衮文行交優皆其教云府志

程煥字德輝早失恃事繼母以孝聞嘗請修邑學書院漳江閣並
通道橋領乾隆戊午鄉薦補安鄉教諭安鄉濱湖煥爲助修文
明隄垸以捍宮牆邑大火捐俸卹之擢知建陽縣改建學宮掘
得朱子地記士民稱慶歸老後著有滋桂園稿書法根柢閣帖
漳江書院匾額及漳江閣中碑記其遺筆也

李世崧字光國乾隆壬戌一甲第二名武進士一等花翎侍衛授

陝西漁渡路遊擊升江西甯都參將甯多水災菘屢食以粥自具册爲民貸官穀其不能償者焚券代償之甯人頌曰非公生

我我安得生

府志參
李氏譜

郭勳字克猷號震世少好學長善騎射乾隆戊辰武進士授廣東吳川營守備遷碣石鎮遊擊歷海門營參將尋擢龍門協副將未任卒於潮陽歸葬縣南鴨兒湖勳公廉所得俸悉與士卒之貧者不給變產足之其守吳川也飢民持錢無所得米勳力主增價招徠諸商民賴以蘇既去吏民懷之爲勒去思碑

胡南清乾隆庚午科武舉由湖北穀城把總歷陞光化千總永明守備乾隆四十九年

高宗純皇帝南巡清以江西臨江

營都司隨

鑾辦差紀功加級五十三年告病歸壽至九十

一歲

胡氏譜

萬崇字知牧乾隆壬申武舉歷任長淮衛宿州二幫領運千總部
揀補滁州衛蘇州千總調任大河等衛千總歷署滁州衛掌印
守備年逾六十致仕歸里卒年七旬餘

張旭字東陽號樵村乾隆癸酉科副榜刻意傳注精求文律友教
鄉里游其門者文章卓有可觀補瀏陽訓導瀏陽能文之士猶
守其法以課子弟旭治親喪概從儒禮著有喪禮衍行世

李安邦字殿侯先世本桃人遠祖勝高於元至治年間以武功歷
任山東兗州府都司遂家焉其父自義優貢生以孝友稱年少
卒安邦兄弟三次安國山東臨清州千總次安朝費縣訓導皆
賴母孔氏葉氏教養成立安邦由武舉洊升湖廣武昌鎮總兵
卒於任子濟滄博涉羣書性瀟灑歸原籍工吟咏著有花萼詩

李世護字寬仁由監生授武昌縣丞有才幹署歸州判州治新灘當巫峽下流山險水駛舟多覆沒時有乘間攘竊者護緝捕嚴懲捐廉鑿石通道撥載由陸運過灘訖仍載之商旅至今稱便歷署武昌黃安大冶蒲圻縣篆以丁母憂歸老林下

李氏譜

郭愈恩字綸元乾隆癸酉科武舉授山東東昌衛千總擢陝西柳樹澗守備硤口都司奉使新疆屯田與土人同寢食均甘苦民樂服役事竣赴都屯民泣送遂以功升福建福甯鎮遊擊卒於官子光廷乾隆己亥科武解元

郭氏譜

萬崧字嶽降號鏡山乾隆癸酉武舉任臨清衛後幫千總調江南鳳陽衛督運千總值江右蝗災須賑各上憲重其才特委之崧減從挨查嚴禁胥役侵蝕務使民沾實惠旬日散畢士民懽呼至有焚香頂祝護送歸署者

朱之興字卜昌號恬菴乾隆庚辰武舉由嘉興江淮衛千總游升廬州太倉淮安鎮江守備廬州屯田多私興之興曰田不歸屯屯無以餉價不償民民何以堪請借帑贖歸淮安屯丁疲且多逃大吏疏以海州鹽軍充補興憫其不諳漕運約諸軍津貼免差爲置田數百頃屯與軍俱安嘉慶戊辰康家溝決興由鎮江馳往設法輓運全漕抵通加都司銜王夢樓太守贈以恭敬惠義額衛人懷而畏之先時京口無湖南船步客舟泊江心輒覆沒興捐置七里港灘埠一里零鄉人爲立祠歷官五十一年

歸里卒年七十四歲

朱氏譜

高璽字松壘乾隆壬午鄉薦初授沅陵教諭以經義與諸生相切劘辰州守否成愛其文延署課子兼監虎溪書院嗣令高苑剔弊釐奸凡積案數語立判暇則獎勵士類以故訟理政平蝗不

入境高苑故無城壘奉檄興築均役同勞又以邑下游患水爲
創修張軍壩防衝救旱兩資其利尋卒於官著有繩愚堂集

行狀

高陞字季升乾隆壬午與兄墨同榜舉人初授甯鄉訓導丁艱服

闕選武岡學正截取授山東臨淄縣其時民多積欠催科急每

逃去陞捐俸以代民輸境內有蝗禱於神旋止人以爲善政之

報云高氏

于盼字仲明乾隆乙酉鄉薦由茶陵學正截取知四川西充縣縣

故城壞於獻賊嘉慶元年教匪猖肆盼捐廉修築並行團練堵

禦法後匪至竟卒保無患調管西藏錢法及拉里糧務皆稱職

擢知雲南阿迷州州有靈泉書院及屬邑義田義學均久廢弛

盼釐清復舊人才蔚興後以老乞歸

行狀

萬世盛字熙平號芷園乾隆戊子武舉赴京會試捐數十金修葺

常德會館愛鼎堂武陵龔大萬嘉其意記其事於石補江南鎮
海衛千總蒞任六載爲上憲所器調江北奉委散賑查出屯田
六百餘頃再調徐州衛別獎懲人徐人賴之值旱散賑一如任
江北時徐人額以惠流江河遂署守備篆務漕督管松崖專摺
保奏有萬世盛爲通漕中出色人員之語

萬世通字建三號敬軒未弱冠中武舉年十九補江南淮安衛千
戶漕督楊清江委勘運河世通度河形勢設爲壩後果河深
水緩漕運迅速調紹興衛丁多積疲每誤漕運世通檢舊案知
康熙七年進剿台灣會畱漕餉十分之三以資兵餉後未散給
存爲閑欸縷詳漕督奏奉 旨查照原數分別支領浙省二
十一幫之丁咸獲沾潤輓運裕如升長淮衛掌印守備值洪水
爲患捐貲募舟渡民詳請發賑不俟批行開倉支給或慮專擅

世通曰何恤吾一人功名而不拯千萬生靈耶兩淮蝗災條陳捕燒挖十二策撫軍胡擊節嘉賞刊行大江南北旋補臨清衛以久歷衛政查悉各省軍丁田畝率多因貧轉售以致困乏通以養丁之產例不許民承受請漕督奏請發帑代贖嚴禁以後擅買擅賣七省軍丁各安恆業逆匪王倫滋事大學士敬葺舒公馳往勦辦以俘獲多被脅良民力白其冤全活約數萬人其爲政類此子宣山西榆次縣知縣以上俱萬氏譜

羅南英字仙塢少篤學乾隆辛卯鄉薦知中部縣地瘠民貧南英建朱公祠表揚忠烈勸耕讀助婚娶有訟輒治遠者就地斷結及解任民泣送者數千人藩司僉過邑境爲大異謀巡撫秦承恩以卓異疏薦得溫旨如此良吏實鮮聞之擢邵武府同

知尋告病歸善畫以雲林爲宗

府志

于公袞字九章號補齋乾隆己亥領鄉薦嚴氣正性讀書以篤行
爲先補甯遠縣教諭率士紳增修學宮甃牆整飭書院延師講
課文風丕變甯遠令吳純祖告休旅費缺如袞勸邑人助以金
始克歸籍遺資士多分廉俸助著有詩文集

郭如玉字瓊田乾隆辛丑武進士補江南守備兩江總督費偉其
英達調署安徽城守營守備旋署浦口營都司嘉慶九年遷貴
州鎮遠鎮右營都司調署平越營遊擊十二年護安南貢象至
京師十五年選授廣東提標後營遊擊駐石龍明年夏卒於官
繼室王氏直隸宛平人通經史質衣物扶櫬歸

龍翔號雲嵐乾隆丙午舉人任嘉禾訓導廿餘年講學以明善誠
身爲要於學校多所培植升湖北鄖陽府教授行取四川榮昌
知縣邑多奸胥赴鄉驗勘索供應甚巨中人產立破翔概免騶

從吏役計日給糧民無秋毫累榮俗不事水利兼旬不雨田卽
龜坼翔親爲度勢指畫令廣修塘堰設筒車農民稱便又其地
艱讀書首捐廉六百元率殷富贖金萬餘設義學廿一區置產
收租寔人咸得就傅制軍戴羨門以狀聞得晉一級及翔引
疾休致士民攀轅者相望於道爲立德政碑顏曰教胡聖功著
有課士餘詩文集倉禾詩話舊志

于曉字楚山乾隆丙午鄉薦知直隸平谷縣蝗不入境調宣化宣
與懷來保安接壤時大雨雹懷保皆受災而宣獨免擢知開州
州有明道書院延師課讀時給紙筆獎勵之嘉慶癸酉鄰邑滑
濬長垣三縣羣匪滋事相距僅五十里曉極力籌畫深濠峻堵
匪不能害以勞瘝卒

高大鈴號畊雲乾隆甲寅副榜樸誠厚重教生徒因材造就尤急

公慕義建漳江閣文星塢文廟考棚皆鼎力倡育嬰施勞苦晚年選承順訓導升承順府教授兼掌桂香書院手抄先儒格言二集名寶善堂要錄待梓解組後捐置祀田並育嬰施棺著有成法壽八十五終子四澡澄邑庠生

潘世輔字輝四由拔貢補洛陽縣丞政尙廉平民無所擾治古文有典法巡撫畢秋帆大加獎藉頃卒於官

于曙號平甫嘉慶戊午舉人甘肅靈朔縣知縣緩刑尙德吏民懷之解組歸宦囊空乏日以詩文自娛

高大鏞字東序嘉慶庚申舉人署福建上杭縣時邑有陳紀傳者於江西龍泉傳習邪教因捕急逃歸籍任甫數月紀傳自首曰高侯真吾父母不忍以久匿累其官訊得其實詳解伏法總督汪志伊奇之遂超補臺灣縣海洋平以軍功擢直隸州知

州引 見回任大吏曰噶嗎蘭距臺迤東幾二千里爲新開地
生番未靖非強幹不能治遂借補噶嗎蘭通判俸滿番與民終
安無事例應內推尋卒子騫拔貢善書著名 京師候選知縣
于麟號定詹嘉慶辛酉舉人安化訓導陞湖北安陸府教授以經
學訓士造就人才甚眾

羅文彪字炳南中嘉慶丁卯武舉第二旋補湖南提標九溪營把
總尋署提標右營千總從征永州錦田苗趙金龍調鎮篛鎮中
營千總從征排穠陞守備從征羊泉鎗子傷腦尋署古丈坪都
司調授河溪營都司傷發病卒長子良翰武生寄籍武陵次維
清由行伍從征道州以把總補用

文運昌號星六嘉慶丁卯舉人宗學教習纂修湖南通志始終其
事補江蘇通州州同廉幹精明委辦積案呂市監生與陳某爭

沙田積訟數十年運昌剖令充學田給紫狼石港兩書院膏火
兩造咸服所結積案甚夥卒於官生平著作甚富尤好吟咏紫

人目爲韻司馬云

參楊本庵雲
韻司馬傳

文運陞號印山秉性嚴正授徒養親舉嘉慶戊辰 恩科鄉試任
城步湘鄉訓導湘書吏有賂六千金求責生員者正色卻之同
年某沒於都 不惜重貲俾扶櫬還城步令梁丁艱累七喪不得
歸爲集紳倡贖以疾歸卒於家著芙蓉圃詩文集待梓

舊志

高渥號晴舫嘉慶戊寅科舉人大挑一等分發河南歷任上蔡南
陽等縣升浙川廳同知所至皆有政聲補懷慶府知府加道銜
公暇輒讀書尤工楷法臨黃庭能肖其神子振奎安徽庫大使
以軍功升直隸州知州

李登瀛字秀洲號廉堂弱冠失怙棄舉業沿例授浙江長興縣縣

丞有政聲署錢塘縣丞擢升長興縣清廉明察善讞大獄以母老告養歸里年七十一卒

張學易字左坪嘉慶己卯武舉初補安福把總爲屢獲匪首授長沙協左哨千總都司印咸豐二年以從守省垣功擢守備署益陽千總補長沙協右營守備賞戴花翎兼管毅福兩營湘勇卒於官

于學質字樸齋任廣東海陽縣知縣廉明果斷歷十二縣民頌其德退歸田里置義莊買祭田設義學延師教族中子弟著有退食瑣言天南酬唱詩集

于學禮字翰臣任河南唐縣知縣道光辛丑河決開封奉委賑恤計口分糧全活甚眾宰數邑皆有德政後補唐縣聽斷精詳葺崇實書院捐廉增膏火以勞瘝卒於官唐人祠祀之曰于公祠

于顏號牧芝廩生肄業國子監初任寶慶府學訓導擢四川銅梁縣知縣莅政嚴明盜賊聞風遠遁士民感之未逾年卒於官

于浚字湘皋官江蘇崇明縣知縣政尙嚴明盜賊斂迹被議罷歸百姓送者塞道先是道光十一年郡大水飢且疫浚時家居捐錢數千緡設粥廠施藥餌棺襯鄉人咸德之

胡克文字華國號約堂性孝友少刻苦讀書無晚近浮夸習中道光甲午鄉試大挑一等分發江蘇南河知縣歷署山陽江甯安

東等篆有政聲同治間因平捻逆加運同銜旋苦簪纓束縛引疾歸推舊產與諸昆季而已以淡薄自奉數年所存微俸既罄家無儋儲晏如也七十餘歲卒著有聲心集長子成績以附生

贊戎幕曾文正移節兩江時保舉訓導

廩生 鴻猷 探

沙明焯號午峯年十五補弟子員道光庚子

恩科鄉薦大挑

分發廣西恭城知縣因時亂引歸銳志講學充邑漳江掌院數載爲文不喜長語一以先輩清真雅正召示諸生其平時警戒喫緊處直如晨鐘暮鼓發人深省不少學者稱爲午峯先生卒年八十一歲

郭如鎬字京甫中道光辛丑科武進士藍翎侍衛授廣西左江鎮都司爲人儒雅無介冑氣而深有機謀廣督勞崇光方倚重之乃丁父艱回籍服闋後無意仕進訓子弟以詩書謂武事不足尙也匿迹鄉曲足不履城市者三十餘年鄉里咸尊敬之

劉鴻

貢生

胡蓋南字雲巖慷慨有至性少時推父遺產三十餘畝與兩兄已館長沙時寄金濟兄乏而自奉甚約中道光丙午鄉試大挑一等以知縣從軍勦賊江西尋統水師扼鷹潭斬馘萬計復湖

口解貴谿圍積功晉同知直隸州加知府銜

賞戴花翎分

發陝西行抵青門南陽擒匪逼襄鄧陝西巡撫曾望顏檄蓋南督團練馳赴商南鍵入陝門戶六閱月旋隨安西將軍福某由陝勦川北餘賊半歲回省又閱視關中城堡阨塞歷三十餘州縣三歲不離鞍馬大吏以其勤勞優禮之同治元年二月權鄜州事四月西同鳳三郡回逆蠢動蓋南堅壁清野設伏以待賊無所得去九月白芨原賊竄中部蓋南夜率眾禦之當是時官軍移駐慶陽平涼又戒嚴蓋南內籌錢穀外應軍旅遂以勞瘁成疾三年二月卒於官歸葬長沙子克恂克光皆能讀父書世其業

向光謙西東村人字爾牧一字子識號梅修道光己酉科拔貢初授醴陵教諭未就由保舉以知縣分發湖北同治庚午署宣恩

篆宣界萬山中復接壤楚蜀叢林菁莽寇盜爭趨是歲七月會
匪麇集勢張甚施南守周慶榕聞變調都統殷開山帶兵奔馳
勦未至而光謙密遣人部勒鄉民防禦各隘卽榜諭解散脅從
已乃督丁壯團兵奮力格戰擒誅僞忠義王楊玉春僞二王夏
菖彥僞左右相鄧先祥楊先春并渠魁二十餘人巨禍始弭制
軍李瀚章敘勦匪功

上聞晉秩五品銜以直隸州升用未

幾丁外艱歸遂不復出僑居邑通道橋上環堵蕭然書畫自給
凡後進造謁者視其品量一一以虛衷獎勵之卒年五十九歲
著有螻蛄春秋六卷秦人宅藏稿詩集八卷其至者悲壯蒼涼

沈鬱頓挫人以爲逼近杜陵云

增生劉逢然採

高振鵬字星陔知州大鏞孫知縣騫子少時喜讀兵書旣長投筆
從戎就陝西潼商道蔣徵陶幕遵籌餉例以縣丞指陝會髮逆

犯潼關振鵬捐貲募勇協同守城月餘窺賊怠地所部夜縋擊
退之以功遷知縣受創賞戴藍翎同治四年猗捻交訌振鵬方
運關中兵餉兼辦甯夏穆大將軍轉輸鞞刀帕首往還十數次
無失事既竣授略陽令五年髮逆復犯潼關適振鵬駐關帶勇
大吏悉其能以城防事宜倚之賊據險南原城垂破者三時振
鵬以過勞咯血不止然力疾誓眾登陴死守四十餘晝夜不少
懈賊乃西走陷華州華陰等縣叙功 晉直隸州知州加知府
銜仍還不任未幾甘肅教匪何從鼎糾悍黨焚掠入境計圖撲
略或以無城勸避振鵬不可謂扼塞憑河制敵之策若棄民而
走必爲全陝憂遂督兵勇伺賊半渡奮擊掩獲從鼎等十數名
餘黨潰散因陝甘所奏軍情失實遂諱其功四年秦饑首倡捐
賑并勸富室以穀貸貧民極貧賑以米且時沿村路躬親稽察

境內以安明年大熟民樹頌聲碑紀其事在任十年凡農桑學
校無不加息振興尤善決疑獄無纖悉冤邑人德焉嗣爲慙直
忤中丞某卒藉他故開缺方伯王思沂西安守林士班直振鵬
欲代之鳴振鵬曰窮達有定且親老終養遂吾志矣卽解組歸
王林亦相繼棄官去某旋因賄敗振鵬歸後勞血遇寒輒發發
必加劇數月不能出戶庭終母喪以故疾卒葬郡城北栗樹岡

高氏
家傳

席大成字海珊邑香山村人幼習騎射咸豐七年投効老湘營轉
戰鄂豫江皖秦隴諸省遇敵皆身先士卒冒矢石不恤其東南
之勦髮捻歷景德甯國徽州各府縣所至克捷而鎗痕幾無完
膚經兩江總督曾國藩歷保至副將嗣捻匪猖獗踰黃河督撫
以大成驍勇奏調赴勦西北陸貢風沙慘烈尤極勤勞一日敵

歷長江並無舟楫可濟大成匹馬飛渡寇倉皇驚為神功奔竄
 無踪復隨劉俊卿副帥克復金積堡西甯迪化州等處擒斬萬
 餘人洗足登陣十趾俱為血污春寒毒發往往紅朽與癩痕相
 映兩肩背脅下孛子深入骨縫中當取子出時呻吟淋漓者五
 閱月速征新疆吐魯番烏什各城旬日采入無勺水寸草之境
 運遠餉竭屢瀕於危卒建奇功犁庭掃穴 欽差大臣陝甘
 總督左恪靖伯上疏疏 恩綸褒美賞穿黃馬褂記名提

督回部肅清後授巴里坤掛印總兵旋奉

旨掃墓

墓在黃石
徐家潭

遷居永定縣光緒十一年九月卒

桃源縣志卷之九

人物志

忠烈

孝友

尚義

篤行

忠烈

夫慷慨赴難從容就義此古仁人志士之所爲然或以身殉其
主或以身殉其城類皆職守所不容已若夫環堵嘯歌之士窮
鄉耕鑿之氓身未膺一命之榮一旦激於天性捐項踵而不辭
若魯男之蹈河鄧忠字之赴敵尤凜凜有生氣嗚呼此綱常於
萬古伸志節於千秋名卽未達

天衢而潛德幽光閱異世而頑懦猶爲興起矧表墓旌闕代逢
曠典則謂忠臣烈士之氣塞天地光爭日月可也編志乘者其
能遺諸

明

剪八士洪武五年討辰州洞蠻凡克四十八洞復令討銅鼓五開
 古州等蠻報捷十四年五溪蠻復叛八士仍剿平之以功封平
 蠻將軍子政著洪武十八年征剿五開諸洞蠻二十一年征剿
 雲南諸蠻俱有功封靖邊將軍父子皆死疆場詔予卹典斂葬
 命蔭其嗣給田三十頃門軍六名外給養軍田七百二十畝

縣志

胡若宏字公廣萬曆乙卯與兄若寅同鄉舉知江西會昌縣有政

聲歷擢戶部屯田司郎中予告歸里明亡若宏盡節

舊志參李彪白志稿

羅應選字元萬天啟四年甲子舉人授廣西柳州府推官丁母憂

去職服闋改補四川龍安府推官政尚寬簡士民悅服崇正十

人六年流賊張獻忠入蜀夜圍府城城眾錯愕失色或議迎賊應

選厲聲曰龍安城小而堅可守也事之不濟天也昔蜀有斷頭

將軍吾輩降乎兵民感悟忠義勃發應選率以嬰守弟應達應
遂應逢應遇皆諸生分道巡禦閱七晝夜賊窘甚議引去獻忠
怒併師攻之由隧道衝東門入城遂陷應選歎曰臣力竭矣從
容著朝服北面稽首題詩於壁曰誰遣皇圖運式微山河破碎
人民非今朝致命無他計再轉英豪掃瘴罪題訖賊蜂至應選
奪刀刃數人而死乾隆中追錄勝國殉難諸臣 賜諡節愍入

祀昭忠祠

明史輯覽

黎夢庚庠生崇正癸未獻賊據澧州屢犯邑界庚督團兵禦之被

執不屈死

舊志

向于軾字長蘇崇正癸未流賊陷鼎城縱黨四掠軾與弟于轍俱
被擄不屈兄弟相爭死賊重其義並釋之而轍已被刃血殷殷
上湧負以歸時軾季妹雲姑亦被擄罵賊齒刃死軾復至賊中

乞其屍歸軾卒壽九十有八

鄧忠字字宙甯精悍猛毅能止鬪牛崇正十六年鄉宦羅名臣羅

其鼎團鄉勇以忠字為長每一決戰忠字奮勇爭先賊皆披靡

十七年同官兵進圍澧州幾成禽官兵賄縱賊逸去宏光年悍

帥大舉破團兵忠字力戰八九日碎身而死名臣哭以詩文同

團向日昇黎民望皆有勇略以鄧死憂憤而卒

府志

魯男字一男少孤為文高古尤工詩事孀母至孝獻賊犯境率鄉

民禦之著有平寇草明末母被賊執乞以身代賊乃舍其母執

男至舟中不屈投河死

李彪白志稿 按府舊志魯死於河異今據湖南通志

謝聖敬以貢生授兵部司務升工部主事從兵部傅作霖奉桂王

戰於寶慶師潰殉難

國朝

蔡斗還義勇識大體康熙中吳逆遺孽

應奇

扼辰龍關於清捷河立

柵綏遠將軍蔡毓榮帥師屯太平鋪持久不下斗還偕沅陵民

向夢熊王玉美詣軍前獻策曰關旁閒道有三一自高崖入出

關之右一自細溪入出關之左一自滄溪入繞出清捷河後截

其歸路左右夾擊可立破也將軍納其言十九年三月初九夜

斗還引提督從細溪入夢熊引將軍從高崖入玉美引郭總兵

由滄溪入約舉火為號兩衷之賊錯愕不知所為遂潰師入辰

州授斗還等中軍守備斗還固辭不就免其差徭退耕新店驛

南里以先導犯賊鋒受傷尋卒

辰州府志兼湖南通志

王大恩乾隆己卯武舉授貴州千總三十九年奉調剿金川陣亡

事聞

詔予卹典如例子承襲祀昭忠祠

縣案

人物志中 忠烈

羅江鱗字飛峯乾隆壬午武舉授貴州千總調剿小金川屢奪碉卡賞戴藍翎授朗洞營守備晉上江協都司先是江鱗以克達之役鎗傷腦背脊肋子半未出瀕死者數次及奉檄征大金川奮勇馳虜軍攻克羅博瓦連獲木城降番四百餘名

朝廷嘉其功授銅仁協遊擊甲午帶兵擣日爾八當噶燒燬賊寨江鱗曰不獲賊首何以報

國尋攻噶喇衣擒首索諾木及其親屬

上聞捷賞換花翎補南騰越龍陵副將晉鶴麗鎮總兵

召見養心殿賞銀百兩又於圓明園命御醫為治金瘡割出鎗子二

顆時從大學士阿西征逆回抵蘭州營派令萃朴山安卡率本

卡官兵火攻賊營斬獲甚眾賊退守華林寺江鱗乘勝生擒賊

首餘黨盡殲凱旋著雲南提督旋回鎮年餘鎗子傷發卒事聞

上震悼交部議卹如例廕一子子葬祭祀昭忠祠縣案參府志

劉光國字精華號竹溪乾隆乙酉武舉以兵部差官補廣西右營

守備征台灣有功 賞戴花翎升興甯營都司惠州前營遊擊

從征安南陣亡事 聞

詔卹如例廕子恩騎尉祀昭忠祠府志

萬年春字喬齡由武舉補江西贛州鎮中營把總調補九江鎮千

總嘉慶元年枝江宜都賊起羣盜四應榔平賊林之華合長陽

賊覃加耀攻陷滋邱官軍破走之退黃栢山相持數月二年三

月威勇侯額勒登保至軍督兵深入四月連拔賊柵年春裹創

戰甚利升守備分守黃栢山四方臺諸要隘防賊竄逸晝夜不

離鞍馬倦則枕盾寐創裂而殞囊無一錢軍中醵金殮焉是年

九月斬林之華於巫山十二月殲覃加耀於終報寨事平

上以額勒登保持久一年奪侯爵並雙眼孔雀翎其將士陣亡及

物故皆予 卹 卹年春雲騎尉從祀昭忠祠子以恩廕千總府志

賀天貴由軍籍充鄉勇剿賊有功賞戴花翎隨同大兵進剿教匪

嘉慶八年攻賊於太平廳陣亡事 聞

詔卹如例廕子雲騎尉祀昭忠祠府志

楊潮嘉慶初征剿苗匪陣亡祀昭忠祠府志

萬士和字致中常德右營把總軍門果勇侯楊芳剿禦廣東夷匪

和告奮勇升千總遇海潮兵潰陣亡

詔卹如例廕子仁培雲騎尉崇祀昭忠祠

文滋盛號樹堂嘉慶己卯副元赴京應鄉試時某公私以關節通

滋盛堅辭以謝嗣考取教習期滿由教官升廣西知縣歷署天

河馬平補陽朔賊數千圍城滋盛擊卻之尋滿西林西林兵少

無城郭粵東賊數萬猝至滋盛公服坐堂上賊人大罵爲賊所得賊渠悉其廉進食不顧強之唾賊面曰廉士不飲盜泉我願食賊食耶羣賊欲兵之賊渠不許益欲其降屬諸室令守者百計誘之滋盛潛然流涕誦文文山正氣歌不輟因作盡已歌以自矢絕粒凡數日罵賊愈厲賊知終不可奪乃釋去後從官軍剿賊行次陽朔與前賊遇督戰甚力墜馬折脛尋病卒年六十有八時人哀之長子世霖廣西經歷署西隆州判卒於官

舊志

羅振萬江鱗孫承襲雲騎尉辰州城守營中軍守備道光十二年

從征趙金龍陣亡

羅文彪字炳南亞元任鎮筵遊擊出征鎗傷頭頂病故請卹如例

世襲恩騎尉 誥授武儀都騎尉

高注字挹之道光辛巳 恩科舉人性剛直大挑分發山西歷署

應州靈邱等縣大吏稱其賢補神池知縣抵任十七日因病告
 歸家居養痾以文史自娛未嘗一至城市咸豐四年夏粵賊陷
 常德分眾略邑境聞注名遣數十騎至其家言公長者吾曹請
 奉為主注從容曉以禍福賊慙而去明日復至注厲聲大罵遂
 遇害從子振榆死事 聞

子卹入祀昭忠祠廕子雲騎尉

張良喜原名明球號貢堂居縣東偏與武陵安福壤相接民氣頗
 悍明球自幼勇力過人居民憚之咸豐六年軍門鮑春霆剿賊
 湖北夢得良偏裨甚喜次晨明球徒步往投春霆曰夢微也遂
 易今名授六品軍功後從胡文忠克復九江府累功授藍翎外
 委奉檄攻太湖縣城九年冬賊酋李世賢由小池驛地靈港來
 援良喜迎戰首先陷陣為長戢所中沒於陣總督官文奏聞

賜雲騎尉世職白金百兩子嵩凱襲

羅良漢字廷貴武生襲恩騎尉任常德千總咸豐四年城陷陣亡

兵部題奏

欽賜雲騎尉世襲

誥授武德騎尉祀昭忠祠

呂本善太學生奉派帶勇防剿咸豐四年五月粵匪竄常六月初一日羯羊舖地方遇賊當先衝入賊陣殺逆匪十餘名力竭身被重傷死邑侯獎照例詳請 旌卹是時賊渠曾天養據郡城分眾四出焚掠邑民皆避山谷武生郭國正短小精悍日帕首衷甲恐不得一官賊賊四十餘人至國正率村民數百追之格鬪良久斃賊三十餘人力戰死事詳湖南通志及褒忠錄同時大高村人歐陽中燦亦罵賊死

姚明祥香山村人咸豐四年投湖文忠公營長沙道中智取賊首

賞給把總職五年正月殺賊於洞庭湖口奪獲賊船百餘艘奏
授千總七年從塔忠武克復安徽甯國等處敘功擢守備賞戴
藍翎十年十二月初六日以涇縣遇賊陣亡 贈卹如例祀昭
忠祠廕襲千總子廷均以廕襲從戎同治三年亦陣亡於浙江
之蘭溪

燕士洪以咸豐九年投効湖北大營敘功授千總儘先補用以身
先陷陣死之

文梅勝兄弟三人投軍長兄藝勝戰沒廣西桂林縣次兄富勝同
子世炳戰沒江西五里濠梅勝武藝嫻習膽氣過人咸豐六年
駱秉章撫湖南募軍援江西梅勝投湘果營遇賊萬載與戰甚
力給六品功牌時洪秀全踞金陵江西徧地賊踪梅勝從諸軍
戰分宜克臨江復撫州建昌崇明及南安府城力解信豐重圍

累功至都司加遊擊銜軍中至是始知有梅勝諸大帥爭調軍
前以爲固十年八月奉兩江總督曾國藩檄勦滇賊圍井研數
重其鋒甚銳梅勝帶隊衝之賊驚潰遁去國藩上其狀進除參
將加副將銜先是賊酋石達開竄蜀秉章徙督四川十一年正
月奏調梅勝由楚入川八月軍抵綿州賊據綿州西山觀梅勝
諸軍由林垵口進攻連平數壘至橋中伏身死事 聞

賜卹騎都尉世職同治三年綿州士民請爲梅勝建修專祠事載
國史忠義傳長子世學先梅勝卒於軍嫡孫昌鯨襲其職

萬年新字子澄以軍功補常德提標前營把總尋補右營右哨千
總從提督向榮征廣西積功補湖南宜章營守備咸豐二年三
月從守廣西省城南門文昌門擊破賊呂公車賊不得逞竄入
湖南四月從雲南楚雄協鄧紹良輕騎追賊轉戰全水道桂榔

茶安攸等縣間累有新獲八月賊間道圍長沙攻南門九月用
地雷轟城裂十餘丈蜂擁而上適年新從紹良追至堵賊裂處
卻之 賞戴花翎賊竄岳鄂進據金陵年新從向榮追剿東至
鎮江三年賊北犯調年新往直隸抵懷慶賊竄山西復從大帥
勝保戰獨流靜海補陝西舊洮營都司四年正月戰河間東王
村二月追賊阜城克小王村又克賊砦三斬數千級生擒賊數
百賊分陷山東臨清勝保知年新可任令提西臨河洲二鎮兵
往剿三月復臨清追斬賊橫屍遍野盡殲諸豐回搜阜城餘賊
四月至連鎮克小馬木城二砦補甘肅洪廣營遊擊五年正月
從破連鎮獲首逆林鳳翔加參將銜旋從參贊親王僧格林沁
復高唐州大殲賊眾追餘黨至荏平斬獲甚眾是時髮賊數道
皆敗屢復南竄僧邸檄年新從陝西提督孔某往信陽州防剿

比至賊入湖北湖北總督楊需調年新赴平靖關追賊棗陽隨
州德安事竣請假回籍六年春湖南巡撫駱秉章奏留時賊由
江西入湖南正月年新敗賊黃土嶺斬首二百級生擒百餘人
獲鎗礮旗械馬騾無算復醴陵攸縣進屯茶陵旋回長沙七年
冬入都引 見授甘肅提標中營參將八年夏署理永昌協副
將同治元年陝西回逆起陝甘總督沈兆麟令年新往剿四月
戰西臨七月戰碾伯皆有斬獲而身負重創加副將銜八月回
任調養九月署理涼州鎮掛印總兵時回匪益張逆首馬兆元
兆貴聚眾平遠進逼固原護理陝甘總督恩某令年新赴之回
乞降使者三反詞益哀年新策之謂回勢大且他回遙爲犄角
乞降詐也於是陽受其降而陰備之十一月果叛卽勒兵先擒
兆元兆貴斬之回不能軍遂大奔見林杪皆官軍軍旗幟倉皇反

走年新縱兵盡殲之二年春諸軍未及集回悉眾向固原年新
率麾下力戰陣亡時二月十五日也事 聞贈總兵銜

子祭葬祀京師昭忠祠廕子金谿騎都尉世襲恩騎尉

馬大桂字月亭家世業儒性豪爽與人力交出肺肝相示尤善排
難解紛故里鮮構訟者咸豐甲寅粵逆犯郡邑其渠曾天養連
舳艫沿江上旌旗五采炫人目惡氛甚張賊偽令凡擄掠人至
戈戟夾岸及船又使數十人擊礮再周江水爲波然後賊首焚
香踞案坐眾乃刃夾脰扶所擄者入大桂時亦在中其曹率以
頭叩船作聲乞命有伏地汗股粟不能言者大桂立笑謂其曹
曰人卽百歲終死耳何乞哀於賊若是忽怒目顧賊養罵曰若
輩以妖術煽人橫行江淮間謂而計得今海內貔貅之士茅立
而起若首著頸不遠矣而顧脅吾降耶養壯其膽不卽殺繫之

會胡文忠公兵至賊倉皇遁遂乘閒脫歸兵燹後隱居課子以

壽終

向傳採按此當列隱逸此誤錄

燕士鳳以咸豐九年効力湖北大營敘功擢藍翎守備禦賊於武昌城外死之

孝友

天下惟經緯天地之才英毅不可遏抑之氣用以赴功而勳業
爛用以砥行而名節峻斯奇耳若夫愛敬之忱根於天性自學
士大夫下迄牧圉廝養之卒皆得據一念之孺慕以與古仁孝
相頡頏而必詡詡然臚其行實夸萬禩而梯無窮恐啟人心飾
僞之屬然嘗上溯有明下迄近今一代不過數人數人不過數
事揆諸神聖精微之理得喪未知何若而屈指已極寥寥何至
庸之行抑亦至難若此也每見喬野之夫評智名第勇功退然
而知不自勝及與摹泣杖之形容繪被蘆之行狀未有不肩軒
睫舞者蒐葺成編雖謂天柱地維賴希一綫之延焉可也

明

張注洪武時以孝友旌

胡順明總角時母病父遠出順明日侍湯藥私禱於神剖股肉以
進母病遂痊夜倦臥床下母憐起而撫之見刃傷流血大哭鄉
里驚歎縣令申請提學補諸生父母年俱八十餘

湖廣通志

向時亨字順世父德海年老多患事之悉如意遇疾禱於神願以
身代父年九十八時亨年八十二

李僑字介甫歲貢生善事父母貢入北雍事將竣聞母病遄歸抵
家母方卒人以爲誠孝隆慶祀鄉賢

劉斗嘉靖間廩生事親誠謹葬父營石槨人稱其孝

舊志

李詡性孝友甘澹薄督學董其昌奇其才由歲貢歷任彝陵沅州
辰州三學教職多所成就子彪白

國朝鄉薦仕涇源知縣

杜維耀字汝晦父祉以貢生授羅城縣丞大藤猺叛當事者檄祉

督兵禦之維耀年十七請自編行間嘗冒矢石爲士卒倡遂突
入賊陣手刃一人賊稍靡大軍乘之鼓噪而前大破猺眾捷聞
擢社荔波令荔波山箐多瘴癘社夫婦相繼沒維耀扶櫬歸推
父所遺田產與兩兄而獨營葬具年二十三矣始授經旋補諸
生食廩餼五舉孝廉棄制舉業游意文翰時逐酒人爲徒放歌
浮白傲睨人世益知名當時萬厯十年薦入太學固辭不就
有司援恩詔授維耀博士強起一冠帶成禮遂以角巾野服終初
社九世祖大山仕重慶別駕數傳支屬多貧者又椎魯不閑於
禮維耀用范氏法食族人而立族訓董戒之

國朝

鄔繼倫庠生早失母父不續娶父病繼倫刺血疏禱於神願減己
年以益父嘗夜行遇虎見一人叱虎去因導繼倫有光燭路人

以爲孝所感

孝子某闕其名常德衛籍桃源縣人順治己丑年秋九月母氏姚染病垂危孝子泣禱於神願以身代因割股肉以飼希延母命士民舉於官表宅閭羅人琮爲之序

沙應琦字炳文事繼母楊無違色楊病與妻羅氏侍湯藥不倦楊亦愛若己子兄弟六人拈鬮析產應琦獨得祖基以幼弟稍遠應琦遂與之易康熙戊戌大飢捐粟賑濟巡撫趙申喬邑羅人琮門生也過桃人琮以應琦事聞親書孝友可風旌其門

羅天緒字慎菴人琮子幼穎悟年十二能文善書法補弟子員戊寅選拔父喪昏斃者數四逮葬廬墓三年朝夕不輟號泣事母愉色婉容積誠不竭乙卯授郴州永興教諭任永八載攄條約八則爲士子勸凡進見者率以崇正學敦倫紀爲訓母年九十

六卒於任所扶櫬歸里哀動路人服闋補授靖州通道教諭抵任卽進多士訓迪謀於邑令設建書院選士造就焉

張洪母多病覓工代耕侍養十餘載無倦志及沒哀痛幾絕廬墓

三年

續晉志

朱珍郡庠生善事繼母偶加怒必跪受之有疾侍湯藥泣求身代

人稱其孝

府志

宋本孔貢生養親不離左右選訓導辭不赴

府志

王文有繼母彭氏甚嚴文善事之怒則負杖請責彭嘗患疽呪之而愈復患目疾餽以舌得明弟瀆彭出也強文析箸尋業罄文分已產以資瀆沒遺姪二歲文撫之如己子學使某褒給義篤友恭額彭卽世年九十六文竟以哀毀過禮卒

府志

馮萬年諸生母有痼疾萬服事三年不衰人稱其孝

府志

李芳年幼嗣叔父叔自生子父召芳年歸終事叔如父勤苦起家

產豐於叔叔沒分己產以予叔子府志

張聖志廩生父哲生早故弟聖教甫月餘志事孀母撫稚弟敦行

孝友內外無間言聖教亦以孝友稱

劉宗式以孝友聞閭里間矜式之親鄰貧乏者時為周恤年八十

有二未嘗履公庭參府志

羅肖祖乾隆己卯副榜入監肄業聞母疾過歸侍湯藥不忍遠離

兄光祖故遺幼姪撫如己子課家塾來受業者必以孝友為訓

著有雙株齋文集舊志

向繼中字精一少從伯父上達學書不成既而學劍亦不成遂棄

去躬耕豐和山中御家整齊鄉里咸敬憚之率妻關氏事孀母

至謹中年兄弟析居母聞遠徙意不樂繼中歲時令妻就養以

感馮弟沒視諸姪如己出遇事言直情深族某貧鬻子力止之
爲養於家卒延其祀年八十八無疾卒

謝天涵字中吾廩生有雋才兄弟皆力農推祖父所遺田產與之
年四十餘卒

于公懷字敬叔乾隆丙子科副榜性孝謹父時英早故母氏李多
病侍湯藥十餘年如一日每寢卽布席母榻下不時定省或勸
之仕以母老辭族黨稱焉子盼官雲南阿迷州知州曉官開州
知州

舊志

高濬字文明少穎悟工詩文補博士弟子員性端凝非禮不能搖
侍父病不釋冠帶而侍時人以爲孝晚年藉岐黃術濟人貧乏
者輒資藥石鄉里感德

周德相孝友性生侍母疾衣不解帶七閱月兄弟四人分爨推產

業與諸弟已而諸弟家落復爲合爨如是者數邑侯朱元增贈有孝友可風匾額

黃朝綬太學生性長厚事父孝卒年八十歲

龍尙攀字仙桂有至性母病減食母沒終身不肉食

唐廷賜父病革割股和丸以進頓愈六閱月而後卒人咸謂數月之延皆誠孝所感云

舊志

印明來道光己酉歲飢奉母行乞至龍陽道中母故來欲葬母祖塋自二百里外負尸歸得食必哭泣以祭時值炎夏尸不腐臭且不僵誠孝之所感如此

舊志

皇甫亨慶字萬邦少孤貧兄弟四慶居長母何氏中年喪明慶遂棄儒業吏奉母惟謹季早殤仲叔完娶各遺一子一女而相繼逝慶復爲教讀婚嫁如初時有勸其自娶者慶以猶子比兒爲

辭鄉里咸重之

舊志

楊恒豐字茂泰少貧貿易致富兄弟四惟兄官甚父母葬養不稍累並資以金置產南鄉兄若嫂暨姪故皆厚葬之尤樂行諸善舉卒年六十有二

羅廷傑原名紋字中錦乾隆間諸生少孤事母孝好學博極羣書尤精周易教子弟一以孝弟爲本喜施濟里人多受其惠卒年八十有七初母闕氏以節孝請旌未及建坊而廷傑病革易簣時尤以爲憾

謝震亨字兼湄大文子恩貢生品行端方善詩文友教郡邑從遊者甚眾事母戴以孝聞有勸就廣文職者辭不就卒年八十有二子啟豐字書圃九歲能詩十五補弟子員處庭幃間克稱父志嘗拒夜奔女自隱其事兩薦秋闈不售年二十九歲卒聞者

惜之

女治盛號郵堂邑廩生敦品殖學鄉試九薦不第尤篤孝友母病躬親湯藥歷久不衰六弟沅盛故遺孤子二教養如己出于世懋恩貢生授徒多所成就內行亦如其父

張範字善琴棋書畫曾祖母饒氏患癱範宇禱天地以身代死母病卽痊壽九十五

魏大名字陽山邑庠生母張氏病篤五十餘日衣不解帶年逾四十出入必和顏承問恂恂如孺子授徒鄉塾盛暑未嘗袒露獨處未嘗箕踞輯有學庸衍義邑令譚震以行不由徑額其壑

周天潢其梈子兄弟四人其梈弟樞無子以天潢嗣然一門友愛四世同居天潢遺命其子鳳鳴伯祖子孫三倍於我異時析產四分之勿予違也後皆遵其言鳳鳴由附貢加州同銜

裴膺德三歲喪父母龍氏訓以成立爲山東詩禮堂啟事道光二十三年由山東北上題請旌表晚歸戲綵以娛母沒終身

廬墓

馮上勛始生喪母事繼母以孝聞兄弟不析財產五世同居無間言卒年九十有八

楊朝榜性至孝有女兒幼字魯姓魯徙四川廣南朝榜奉母送姊入蜀母老思歸朝榜肩囊負母跋涉千里比反遂成瘵背痠瘦足蹙蹙狀猶若負母然卒年九十有八

劉東年十五喪父貧無以葬鬻身富室得懸棺焉葬畢就傭以完其債歷十餘年子母猶歎同里宋某憐之代償後以傭工積金娶妻生子七家亦小阜

許廷佐字帝臣邑增生早失怙恃事繼母如所生季弟賢嬰瘡疾

穢甚廷佐親爲敷治無憎意弟夫婦沒課遺孤繼昌繼成如己
子昌郡庠生成明經授徒一以禮法年七十餘無疾卒先卒一
日黨沐以俟若預知其期者子繼安繼鉸繼恩皆諸生

龍際飛字洞宣郡庠生少孤貧事母孝兄沒際飛體母志移姪同
居教讀完娶皆自任之病革遺命硯田所積與姪平分

陳公斌字荷亭邑諸生家庭以孝友著早卒病革時念弟子二已
僅一子且幼遺命子曰汝他日力學勉爲端人母以財產爲重

析爨時汝取十之四叔取其六勿忘也閭里歎爲難及

庠生劉夢齡採

黃家遠家赤貧事母孝異母兄老且病命子女旦夕捧水進膳無
倦容爲里長三十年奉公守法未嘗受守令呵責性廉介隆冬

著單布衫日不舉火澹如也士林皆稱之

貢生王起庚採

程度涵太學生天性至孝母郭氏素嚴厲以登樓墮地身半枯涵

旦夕奉事惟謹中夜聞母轉側輒瞿然驚寤詣床伺便溺無間
寒暑兄弟三涵獨任迎養無一日離母母亦不可一日無涵也

母沒以哀毀致疾不數年卒

庠生程希洛撰

龍尚灝光緒辛巳歲貢也幼孤家貧母夙嬰痰疾茫然於事時灝

方就傅朝夕爲母烹飪食畢然後學至浣滌穢垢悉爲躬親人

謂幼兒如孝婦焉學成後品端行粹尤爲後學式型

劉鴻翔採

劉道和延口村人字晴崖號弁菴少穎悟目數行下落筆輒千言

年四十始補諸生家素窟館穀謀養而天真爛熳恒恐失高堂

懼父愛厥季臘日衣羔裘佯失足墜水道和默喻笑云此裘著

水無復輕煖請父解衣其弟而爲父別製新裘其先意承志類

如此

廩生商彝採

呂之揚母王氏得廢疾輾轉床褥者六年揚晝夜扶持飲食衣服

俱親理之時以為難

生員魏燾採

宋業範貧無立錫地與兄魁寄居廢寺魁抱殘疾莫能興範乞食養之衣食藥餌多方調治魁以病故善怒稍拂意則形於色甚且唾罵範不計也如是者十七年魁沒越日範亦沒人以其生死相依合厝於青山灣

生員魏燾採

李逢堯字大勳兄弟三人大勳生獨晚少貧佐父起家後仲歿伯兄子壯請析居人謂伯兄係養子贖產固季有也勳卒均分焉未幾伯負重債勳代償之不一及伯子又分拮据彌甚勳復時給無少吝然不為姑息愛姪有過悉令跪而杖無愆言以此鄉里或相爭多就決之人咸敬服

葉炳南字立齋積學入成均少失怙恃事祖母劉極孝劉患目疾每以舌舐之家雖拮据而致養為備尤勇於為善邑俗多溺女

惻然商同志出貲作育嬰會生息賑救南理簿書十餘年計活嬰九千八百有奇年六十五以善終

李元鑑字玉萬性孝友而貧甚兄弟四元鑑居長以父命服賈致裕嗣父得噎疾甚危然諱言死元鑑密備後事及卒殮葬如儀未幾諸弟謀分炊元鑑諭以母在不可弟稟母請益堅凡產俱任弟自擇而已拾其餘焉有季弟母獨憐愛之鑑先意承志常分潤財帛以資膳脩三弟從居彭咸無後以遺產豐嫁其女餘皆充祀田年六十四歲卒

廣正魁字輝殿少孤勤學然數奇屢困風檐遂絕意進取其祖以農業起家由土東移居延口手買桐木村田數畝鬻者沿無賴惡習需索無厭鄉鄰居間則議錢與之歲率爲常及祖沒析箸正魁天性友愛虞弟不勝其擾乃以延口近城之產與弟而已

獨遷居桐木甫移家有劇盜胠篋以逃魁獨奮拳追獲送官寘諸刑盜風少息咸豐甲寅粵匪竄郡縣盜夥謀爲賊嚮導甘心於魁先以危言恫喝之魁鬚髮怒張大詈曰吾見爾得獨生也會賊至渠技未及施已爲寇盡數虜去尋陸續逃歸官令嚴捕從賊者咸匍匐請救於魁魁轉爲出脫卒成善良性好施予聞或不能舉火罄資與之家中落而感恩者猶有餘思焉

胡克超號卓堂廩貢生邑庠永清子性孝友母藍氏病風痿飲食不能自主進膳時超必手捧入口母餘粒輒自食歷九年無懈容訓弟成名友誼肫肫教授生徒有法鄉試三薦未售年六十

卒

舉人陳燮採

李明德字如松世居上香山村家貧力耕養親道光戊申己酉歲大祲斗米千錢謀旦夕者多逃散輕去其鄉明德爲母故盡售

青苗委妻張氏供膳而值少不給復多方行傭數百里外負荷轉運屢瀕於危始得以力易粟保全遂其苦志荒歉後愈本勤

儉為家法得小康子三季春暉庠生壽八十餘卒

庠生王文所採

張世榜號琴峰性敦篤內行式鄉閭子二長早沒惟存次子國俊字智菴榜每念胞兄世儒乏嗣主器無歸慨然命俊承兄祀入乾隆間太學後俊舉四子仍以二子奉榜祀人以為能世其孝友迄今兩房皆蕃衍云

謝達亨字成章故雷氏生子數月為里人謝元吉所育因冒姓焉元吉家貧少時命從塾師受論語輒止後元吉沒母彭氏病痿且目瞽家益窶達亨行傭奉母終身無惰志向刺史光謙為謝孝子歌以表之辭曰座客且清聽聽我孝子歌我行逾四海閱人一何多獨有謝孝子庸行永不磨嗟我亦人子已矣可奈何

一解問孝子所居與予同井里父謝而母彭羸負半歲始彭初未

有子因于他人子彭後有二子乃獨子其子二解人事難量二子

尋殤孝子行乞父母是將天平不弔父亡母盲母盲尚可母痿

急殺我三解孝子出傭母眠於牀望兒來哺充此飢腸母甯兒知

心有徊徨兒腹則飽母也無糧四解舍肉減食歸為母遺心恐來

遲為主人譏眾傭輟耕孝子潛回奉水一盂日暮即來一日三

返厥時無違五解中裙廁踰身自浣滌手足胼胝面目犁黑母身

幸肥兒身則瘠六解伊母身之肥兮乃母心之怡兮母非子無以

延旦夕兮歷十二年孝思無虧兮猗嗟孝子昔師府君今乃人

師兮僕生不幸所幸識紫芝兮七解

七解 增生劉逢然採

尙義

大君子胞與民物不市惠以要譽而舉萬國九州嗷嗷待哺之
眾出諸焚溺之中而躋諸衽席之上而慈祥愷悌之隱借保惠
教誨之心以俱來汨汨乎如泉之注而不竭也恢恢乎如雨之
潤而不遺也蓋其揆之義者精耳至於閭閻嚮善之民無詩書
以淪其靈無嚴師益友以砥其失一旦遇可矜可憫之介乎其
側義形於色率性而行轉有爲縉紳大夫所萬難望其誠摯者
此龍門太史所以高任俠之風而朱家郭解者流亦附簡編以
不朽也夫末俗偷矣去古任卹媮睦之教豈第周末秦漢而已
哉而捐金貸粟除道成梁諸善舉且踵相接甚則顛連困苦死
生呼吸確守其蹈義之初心而不渝以此見天地俠烈之氣不
容盡息於人心而磊落光明之概時有作焉襄而成有情之宇

宙也壺殮而形德色箕箒而為諱語抑亦可以稍愧矣

明

蘇彬洪武二十五年邑苦田荒額糧難辦具疏赴奏未允二十八

年復擊登聞鼓自縊其下得疏於懷特免糧二萬二千石萬厯

四年知縣鄭天佐具詳請立祠祀之賀奇府志 羅人琮縣志

生任山海丞張世用奏設新店遞運所省祭官陳禧奏折色唐

倫奏改回沅州屯軍清查詭寄登答錢糧新店驛設縣雖未盡

行皆能留心民瘼亦附祠配享焉按彬上疏時
燕政正統六年歲飢輸粟一千五百石賑濟有司以聞詔賜義門

仍免三年賦役通志

向陽暄字日華成化時諸生性耿介潛心典籍子廷美廩生好學

而有遠識無子遵陽暄遺命大里田五十餘畝為向氏學田歲

入租分給在庠者

鍾志達歲祲煮粥以啖飢者穀值騰貴復發廩減市價之二糶之所受值仍輸於官以助賑恤

湖廣通志

劉伯鑑

一作鑑

萬曆貢生江西分宜縣訓導捐金掩骼兩臺旌獎士

林歌頌卷帙盈寸縣東三里許延泉一帶山巒爲縣治儒學下關石工頻年開厥鑿石損害風水萬曆十五年伯鑑倡義呈請府道立碑嚴禁有裨閭邑因名其地曰碑記岡

舊志參縣志

劉希儒字奠侯明增廣生爲人忠直有膽略明末流寇南竄率族眾與邑人羅其鼎向日昇黎民望等謀爲團練犄角防禦賊畏不敢長驅自崇正癸未春闖賊由澧犯境九月始爲團兵格鬪去十一月二十六日張獻忠忽屠郡城血厚凝七寸許旋遣馬上戴上犯希儒等率團兵拒戰縣東毛家橋敗績初入東門賊手藍旗戒眾曰天下七十二福地此其一也毋庸焚戮尋乃移

營奔蜀而國兵已大挫矣北都陷後史閣部奉福王稱尊檄徵甚急儒慷慨破產間道以輸閣部擬題旌忠義辭遁歸後聞南都再失泣而不食者數日於是舍縣城故居隱墨灣山中不復出數年以善終壽九十七亦自號百歲翁墓在桐木村墨灣隱

居園內

向文奎採

余勝舉嘗與邑人羅名臣向日昇等團練鄉勇禦流寇事平有戰地曰祝庚潭枯骨滿野督傭檢瘞於雲圖山

府志

從實張六守義李大宏邑人羅人琮之僕也順治初王師下金陵進規浙閩湘南郡縣奉明正朔無恙四年浙閩粗定回師向楚岳常澧道始歸版圖五年明遣撫軍堵允錫帥師出永定衛略常德分遣王進才軍縣城進才故流賊黨游騎四出虜掠井閩人琮說進才令嚴其紀十月王師復趣常德進才南渡走

賈衡先是人心風鶴徘徊楚漢土寇流賊復來去無時人琮以
明舉人練團堵勦實六義大宏襄舉義旅每戰必先驅陷陣至
是進才南渡人琮蓄髮匿山中捕事張英芳捧檄收進才兵所
遺輜重細民吳虎兒爲芳鄉導投刺人琮逼索四百金餉軍有
頃虎兒就縣告人琮從明縣令逮人琮魯男胡維祺等數十人
入獄實六義大宏毅然請從繫數月蟣生襖褥間主僕梳爬爲
樂人琮戲贈之詩曰繩頭蟣蝨長如蠶提取無心數二三何處
可容王景略莫拋世務悔高談讀此亦可想其胸臆矣建明事
平義大宏從人琮得釋實六已死繫所卒無怨色

向文奎採

國朝

胡江字注南其父過陬市紫霞灘幾死於水矢必修橋未遂卒江
於康熙中乃架木砌石工未竣亦卒子以泰繼之費至三千餘

金邑人文曙顏曰詳因謂其能承先志也同時余滄遠捐修橋

道亦費千餘金

通志

何如蘭字蕙菴庠生雍正丁未歲大水殍殣載道蘭煮粥濟飢全

活甚眾買僕男女四人詢知爲大族卽送歸籍助族戚婚喪解

爭訟出貲不吝孫乃修貴州施屏縣丞

續縣志

吳授昌字克讓庠生隨母兄早卒遺二幼子撫教成立給以田辰
民譚某流居北鄰夫婦俱亡爲殯葬並恤其孤子宗夏捐田充

沅陽書院膏火

熊登先字翰飛嗜書史繼母喪營葬廬墓歲歉施粥食飢者遇人
窘急及嫁娶過時率資助之

楊炯字大同遇鄉里貧餒者輒予衣食施棺槨有劉某負債賣妻
炯勸止代償之給田使耕寬其租課邑令于聞而美之舉耆老

使理社倉出入無徇私侵蝕之弊鄉里稱善

魏文朝字再宣號鶴山成童喪父是時大兵進勦吳逆文朝外應徭役內自節儉家以漸豐時分給貧交及宗人之困乏者有餘金或瘞之至今里人猶時掘得藏金窖焉

萬言秦字康侯號台山捐沈溪田八畝餘入文昌閣香燈貲又修鄭家驛街石道置王家橋義塚至今賴之子崑武進士仕遊擊岱二甲第一名花翎侍衛仕總兵

萬言鈞字淮上號雲山邑庠生重義輕財人有急難求無不與力不能償者輒還其券里有負欠質子者代償以贖之子巍乾隆丁巳武進士二等花翎侍衛崧武舉崔諸生

向迴字自牧諸生慷慨好義推田作祀產及義學縣令巫楨孫記其事於石晚年遊東廡寺見王守仁題壁詩愛之構間鷗館於

其側以時遊詠

程惟忠字心一捐建紫坊口橋造渡舟歲荒施粥遇嫁娶無出者

輒為成就年六十取千金貸券悉火之子孫皆名列諸生續縣志

蘇如珙六世同居內外各擇一老成者督家政不設計簿每食百

餘人按口均給子弟各執一業無私積乾隆戊戌歲飢族鄰某

欲鬻妻賴如珙得全有子二宏紋宏綱夫婦年俱八十餘孫文

俊文鵬曾孫應鼇皆成諸生嘉慶庚辰縣令譚震至其廬男婦

以次見悉加獎錫並撰序文表之申請入 奏建坊道光元年

岳常灃道多資給六世同居額縣案

李汝翼字為友總兵安邦孫雍正四年大飢出粟濟鄰拾浦市何

某遺金於道遂還之孫際清領鄉薦

龍士相號柱史幼負奇質事父母以孝聞昆季五人尤相友愛析

產獨取瘠者里有忤逆子往諭之卒爲孝子鄉人比之王彥方
家居立松濤書塾授徒爲業晚年尤刻意研究經學著有尙書
古文辨疑二卷松濤山房詩鈔卒年八十二課孫翔弱冠成名
官四川榮昌知縣

萬國安慈惠多善行年六十始生子人謂其有隱德

按舊志載國安年六十無

子其僕萬玉勸納妾生子教讀完娶皆極力營辦安蓮疾醫治不效玉割股愈之壽至八十三其義有足稱者

彭上驥字德超八歲喪父善事繼母素好施與里中貧窶及孤寒者必周有爭訟者必曲爲排解臨終取貨穀券約二百餘盡焚之續縣志

楊國璽字君正爲人有大度饒風好善樂施提督俞益謨給聯旌獎之武陵太史楊胄遠尊之爲大阮平生期許有不寶金玉而寶賢子孫之語

馮達生與羅慎生文質生相友善邑中巨工大徭役三人鼎立同勸歲飢布粟助賑不較值邑令于文燦給額曰德堪型世

王尙榮字南一乾隆初年以跣緝馬李二逋賊徭役苦民乃輸粟二百餘石代民供給孫國泰寄籍桑植乾隆乙卯鄉薦補靖州學正

沙可玉字君欽順治康熙間差徭煩重農務荒廢可玉於鄰里應當雜派率代爲籌辦不以相累子中金郡庠生

程萬鎮字元生雍正四年旱鎮捐粟百餘石集好義者於蟠桃觀作粥賑飢全活甚眾

羅時揆字百敘少賴伯父慎生教之成立敦孝友樂施與子澤岱有黎姓以貧悔婚議將成亦貲完其配

羅時懋素行好善以邑書院久廢遺命有修舉者願以田充膏火

後如其志捐田若干石子澤溥舉武科

府志

高燾字遂菴篤學力行好善樂施倡修盤塘五福于家等橋累石

構積費三千餘金遠近稱之

府志

胡琮字蒼友貢生乾隆間歲飢營積粟以賑窮乏邑令沙給惠周

鄉里額

府志

李杜字非一諸生胞弟珣出繼他姓杜以弟家口浩繁均已產子
之凡債有貧不能償者焚其券本學以實蹟詳司獎之子文輝
例授州同捐置祭田數百畝有餘則以周族中貧乏乾隆乙酉
飢文輝罄所積穀減價糶之年八十卒知縣表其墓孫世豐乾
隆丁卯武科任江西銅鼓營守備

舊志

李文翰字羣玉文輝弟例貢生豪俠好義喪葬無力者厚賻之邑
南粟家溪人多病涉文翰壘石成梁今稱為李公橋

高大錫號晉三由貢生考取正白旗教習未滿館以病乞歸性端嚴不履城市捐入宗祠田十餘畝春秋奉祀賴無闕焉

郭中信字由仲庠生通岐黃術每以藥醫貧者守正不阿遇事情恕理遺爲人所服有艾氏兄弟忿爭忘其死將往質及其門交相悔而歸子仕薦舉武科

府志

張澄字靜芳廩生勸學厲行葺郡縣黌宮及修沅陽書院考棚澄年七十毅然相事病時猶屬其子其霖繼之

袁鑾字諸生初出繼伯母向氏後弟欽生鑾友愛彌篤析箸後欽不事產業漸就衰替鑾割田數十畝予之

張德溥諸生能文章以優行見重於主司非公事不見官長處黨閩有直聲篤於交誼先達故人弔必盡哀

文天然與兄卓然百口同爨兄故天然老且病念兄子六已惟二

析財產爲三子兒子二人以爲難

謝權字衡萬兄子之勤生甫兩月而兄與嫂俱沒權爲歛葬以勤命子婦李氏乳哺撫之成立分已產五十畝予之年八十卒彭游諸生家頗裕幼訂饒氏女未婚而女瘖女父不安命游別擇配游堅執不允已迎歸歲餘以指示意勸游立側室不可後生二女以其弟子爲嗣

李如松字石鱗候選縣丞家素豐嘗減租以惠佃戶邑沅陽書院成捐膏火田若干畝及建曜日巖壇復捐數百金倡其事未仕卒

舊志

趙城字國珍嘗拒私奔女於客邸邑西馬家渡至縣市石道綿亘數里命子邦浩力承之孫永年士龍諸生士達例貢生

趙士達字月橋以創修是橋得名積學未售由例貢赴部考職親

老加理問銜終養邑

聖廟書院浮圖桃源洞諸創造鉅務悉

助貲襄成年八十八年長子積鎔太學生己酉歲飢罄家貲市

米五百餘石半價以糴里黨賴之次子積鈞邑庠生孫文治廩

貢訓導未仕卒

李世紀太學生好施與乾隆戊戌大旱捐貲煮粥全活多人並倡

修小洋橋石橋至今賴之子廷誥廷召諸生

郭近明字光遠乾隆己亥歲歉酌濟鄰穀二百餘石乙巳又歉有

雷某者欲賣其妻近明引至咸豐分地使種夫婦獲全生二子

嘉慶元年教匪滋事明克成豐約正團鄉勇拒之有張氏女已

秀甫六歲父母死於賊近明收育以嫁妝奩如己女以禦匪功

授把總

龍兆琰字純儒號蒼無德元子邑增生中年隱雲霞村之高崖溪

流屢漲行者苦之兆玖獨力成橋捐田十二畝以便歲修人名
蒼公橋

李聖道貿易漢鎮同舟某商遺金三百聖道急藏不令舟人知數
日商來聖道悉還之

全凌高號香山邑庠生忠厚嗜學一日自慈利歸道拾遺金一囊
卽坐候俟其人至悉還之己亥鄉試寓又嘗拒奔女人以爲不
可及後無疾卒

劉恒昌初貧而力農致富喜施予鄭家驛下渡船夫工食向無所
出捐田十一畝贍之子安邦有父風置白石村柑子灣義田八
十六畝歲租用施棺木給孤老助婚配修橋梁等費又施榮祿
山寺田

游道南字靈毓武生家素豐歲歉讓租減糶遇遠鄉災民扶老攜

幼百餘口嘗厚給之捐四百餘金修麻溪嘴至湘市潭石路十餘里

劉曉字於天剛直好義每捐貲修橋梁道路鄰有負債鬻妻者代償得全年八十時盡出簿券焚之孫光黎邑庠生

沙洪書性渾厚除夕有偷兒入室書覺密飲以酒厚貲縱之去及死有弔者哀甚家人詰之曰來哭恩人耳自後每歲元日先有人拜於墓孫明鑑明泮固詢之始吐實鑑等愕然曾孫南英南杰俱舉於鄉元孫登高髻齡入泮

舊志

王登皆字功敘性孝友博學能文以明經鄉試屢薦不售尤好施與值母七旬免租入三之二減價出糶推食解衣散千餘金教子必延名師聞某有學行厚聘之或言其傲曰傲則必嚴嚴師可多得乎藏書數萬卷俱經讐校

胡宗崑號朗峯郡增生性寬厚與物無爭己酉歲飢鄰有鬻妻者
給貲全之卒年八十五

劉志龍字如天家範最嚴道光末食指七十餘同居有貲輒恤族鄰
楊輝山國學生其生平林泉自適寒賤有求者不稍形吝色凡邑
中大徭役樂襄成之

姚占鼇字星垣家頗裕道光壬辰己酉大飢皆捐粟助賑歲施寒
衣數百領捐陔市義木堂田三十餘畝

周其栲字南山性長厚重斯文以耕讀課子孫五世同居與弟其
樾友愛甚篤道光二年捐地倡修觀音橋義渡

高元善字與皆道光壬辰歲飢輸粟助賑己酉大水獨駕小舟煮
粥啖飢者復請發義倉粟減價平糶事竣以勞瘁卒

李友尚字勉齋太學生敦孝友好施與樂善不倦子正仁克繼父

志鄉里稱之

宋開智字小康好施與卒年八十三長子儒魁儒獻俱慷慨有父風甲寅粵匪火其廬燬及椽瓦頓滅賊持炬焚者再皆如前狀乃歎異去

許登湯字執中大學生修乾潭石杠義渡及明水冲草坪等處石路數十里妻母周蕭氏嫠而無依迎養以終其身殯葬盡禮卒年七十五

許登禹字尙文方正好義治家森嚴設義渡濟人道光己酉歲祲里有鬻妻者券成將昇去禹予緡使焚鬻券值歲暮推解衣食文運新號南清武庠生性正直敦孝友通醫術貧乏有疾苦嘗資藥物遠近延者無論寒暑輒往治痊不索謝年八十餘卒

李際清字冰壺中道光癸卯舉人癸丑大挑二等選芷江教諭經

明行修尤好善舉已酉歲大禡道殣相望際清爲勸捐平糶開賑甦全無算

孔廣松字穆堂歲貢生敦品勵行課子弟生徒甚嚴兄廣校早逝撫姪耀如已出鄉里有紛爭得一言卽解道光辛卯漲決杜青關郭堤爲郡城患倡修不辭勞瘁邑侯趙稱爲一方保障其急公多類此卒年七十有二

方伸清道光己酉歲大飢罄出所有助賑更多方借貸以濟不足卒年八十七妻趙氏亦八十二卒

童文燿太學生輕財好義族戚貧不能讀者多貲助之族子鶴齡自人泮至鄉薦皆所玉成

姚大鵬字萬里性渾厚慷慨好施創修義渡及一切善舉無不樂爲弱冠鰥居不娶享壽九十九撫一子光主成立有父風品端

正義方訓子壽至七十八

高鴻字雁峯多義行曾勸捐本族置田十餘畝以作育嬰之資迄
今三十餘年遵行未替

龍尚鑄號雲彩邑處上慷慨仗義雖家僅中貲遇遠近寒儒暨貧
乏者必多方助之子縉舉孝廉方正

廬士英號良廷年六十無子然喜成橋除路倡修義渡及諸義舉
藏穀頗富減值糶之親識以緩急告立應無償輒燔其券戊戌
歲祿爲粥於道冬施寒衣甦存無算六十四歲側室羅遞舉五
子卒壽八十有四

盧紹福號祝珊幼閑弓馬道光十九年納粟河工授總戎不赴願
養林泉已酉歲設村儲告罄居民無所糴紹福移自鄰縣全活
甚眾道殣相望市櫛瘞之邑令王梅村手書爲善最樂匾額旌

其間卒壽六十有三子仁沛仁澍

盧仁沛號瑀亭自號石癖子放蕩詩酒然精醫術常起人於瀕死不受值著有賽花小草眼科匯參待梓

盧仁澍號蘇舫幼穎悟長工詩賦以附生舉同治甲子孝廉方正除廣東縣丞署洋藥釐金局事稱職俄丁父憂去職服闋由河工捐加同知不赴隱居蘇黃間市城稀見其面然保甲援防暨文廟諸公務毅然引爲己任邑令勞銘勛嘗誡門者盧某至無留報其景慕如此壽六十一卒

誥封奉直大夫

楊珍號石農國子生性嚴正樂善好施嘗款留楚北天門縣逃難士郭大亨數載歸仍賁送之凡修造諸義舉無不極力襄成妻陳氏能助於內氏年六十八卒珍年九十卒子步青步榮步盛

庠生孫沅棟仕訓導曾孫禧烈棻煥等皆名著膠庠

朱正太學生急公好義修漳江閣福善寺等處皆資力焉

朱泰字魯瞻國學生好義舉邑建

文武廟及諸寺觀皆與有力

子之麟性冲和篤友愛以岐黃術濟人不受謝金人多稱之

羅紘字冠卷乾隆時武舉疎財仗義慷慨有俠氣兄子江鱗棄書學劍爲父所逐紘夜夢黑虎當門驚起視之乃鱗立雪中收教兵法鄉會試皆出紘貫後江鱗屢立奇功至副將旋擢總兵以本身應得

誥命贈封紘乾隆三十一年大水衝汎枯骨滿野紘獨修石塋於邑

東郊白佛寺後僱工收藏之時有女棺於水漩流處不去買舟曳近岸其蓋已失內有金釧紘並瘞置塋下

方仲春性耿直終日不出一刻薄語道光己酉歲大飢罄所蓄助

賑更多方券貸以濟不足卒年八十七妻趙氏助成善舉亦八十二歲善終

方續和號鳴盛立品正直見善必爲己酉大飢親戚鄉鄰賴全活者甚眾卒年七十六歲

艾學黃邑處士體魁奇見者起敬里有爭訟輒助資解之

唐世袞邑處士敦友愛樂施濟里人無不稱道

胡文俊郡廩生秉性剛方言動不苟人皆敬憚廉潔好義留於水田村送李姓陰地一區親立賣券不取分文子孫皆昌盛

李登儒字書林以孝友見稱尤精岐黃術不受謝並施藥濟人著有痘症新書卒年八十一子大椿增生大銘例貢生

皇甫利祥字興庵從九性孝友與弟分爨迎父母就養不累弟持躬儉而爲善不稍吝縣南鄭家驛沉溪紅岩壩等處捐修石路

約十里許塘河合溶兩渡船向無公項各處均置產充補砌修
船及渡夫資易簣時遺屬契施南鄉沉溪倒馬壩山場屋宇及
水田四石壹斗稟請立案永作

聖宮應須雜費

高烈祥字大勝孝友好義境極窘待母弟恪守遺命每值弟困阨
不計己之有無力助之鄰有負債鬻妻者哭甚哀烈祥多方籌
償貸金得勿嫁年七十餘卒

朱之鯉字星北爲人正直有義氣戚友中貿易乏本者輒出資助
之延師教子始終敬禮不衰

馮人官土東村人家貧而樂於爲善每有義舉必倡首募資贊成
其事屢全人婚姻名節有某佃欠某租並債項甚鉅無力償之
窘乏幾斃人官代緩頰陳大義某某悟遂得寢

陳燮理採

曾廣變號沂生獨捐千金置買田產倡設義學振拔寒峻津逮士林義行高於一鄉

吳良秀探

梅漳號清源髫年遊泮尤慷慨喜成人美事爲族黨間出費完娶者數人

張尙元字連生家裕好施與乾隆辛亥除夕焚券千餘金邑北下馬家渡至縣市創石道數里尙元獨力成之其餘捐產以篤宗族減糴以周鄉鄰刊前輩格言以勸人皆善舉也

楊先智字天錫素行好善施棺木濟困乏邑北下桐木港深水港義渡及雙溪寺文昌關帝二廟共施田十七畝備香燈歲修之賞

羅暹昇原名顯邑庠生好學不輟少失偶無子不再娶撫姪成立姪沒復撫姪孫修金悉爲教養完娶之資義行推重一時卒年

八十有八

魏國相庠生敦品勵學好善樂施羊毛灘西河義渡蔡家堰岩橋均獨力創建行旅賴之

萬民秀字司掄太學生品行端正不肖畏其知名遇寒士不能讀與試者助貲玉成之修造道路與梁諸善舉罔不樂爲倡首其

子年梓亦如之卒年七十六歲

程希洛採

吳文鴻號雲溪孝親信友學優未售主鄉塾四十餘年循循然以文必先行各宜保全固有爲訓邑孝廉沙明焯郭世嶽俱重之引爲莫逆交卒年六十有六

程希洛採

姚廷鈞號力吾學優未達精盧扁術他人束手者治多神效然不索謝應總鎮孫吉安聘參謀軍事以功保授五品州銜卒年七

十二 程希洛採

羅嗣宗字純孔幼孤貧傭耕養母有孝聲中年家稍起除舍後地
數十畝所出粟以賑貧乏年終計親識中之難度歲者餽之斗
米豆肉其未周者談歲詢及輒促家人補送年八十無病終子
以寬字德中行己以父爲的親串以緩急告立應囊盡爲貸諸
鄰坐是家稍落况卒某里之虎而冠者也仇其債訟以寬於縣
知縣桂林劉石渠夙聞以寬義得解歸曰家本疎財乃反以財
得訟耶出所藏千餘緡券燔之年七十餘卒與父嗣宗皆以孫

潤璋貴

例贈文林郎

優廩生張贊琳孫

程步雲號仙橋照磨銜性厚重樂善好施自本村櫟樹凹建修岩
路直至大楓坪計二十餘里施槽木近二百口又專設義渡濟
人見無告窮民必給衣食乞惠者遂填門不絕云

程希浴採

馮人臣字純夫號杏園例貢生故贍於財散以貸貧不能償輒焚

其券倡修邑演武廳對河文星塢人臣獨無侵牟邑宰沈粟仲手書善爲樂方胡芝房書德作福基匾額旌其閭恭逢

穆宗毅皇帝大婚覃恩以孫志垣官賜封朝議大夫

馮人翰字文藻號西園太學生性純孝居喪盡禮贈貸戚族不取償道光己酉歲大飢道殣相望邑令議賑人翰出百金助之罄所藏粟分子親識存活無算減豐甲寅粵匪犯縣城邑令樊古愚募勇捍賊人翰指困輸餉雖無成功邑人多其慷慨云

馮世焜字映奎號雲岩例貢生性和藹好施戚里以空乏告立應倡捐義穀數百石備荒燕子岩溪水過阻通衢世焜創建石橋行者便之恭逢

穆宗毅皇帝大婚覃恩以子志垣官 誥封朝議大夫

馮志垣字紫薇號藩陔開敏純篤孝友性成其家五代同居食指

百數志垣總理錢穀半縷一絲不私於己內外無間言者垂三十年比閭貧困多待其舉火人有以急難告立爲消弭過無德色同治中由貢生援籌餉例議敘通判加同知銜不就家居邑境自經髮逆之變十餘年後民猶囂然不靖志垣倡辦團練保甲詰奸禁暴城鄉得保無他自奉儉約及新建文廟同弟罕皆立出千金爲一邑倡後難藏事復假三千金不取償時邑育嬰堂虛存其名志垣就比鄰出貲養之全活無算年四十有九卒四鄰聞者泣下累日

馮志城號罕皆生而穎悟讀書目數行下補弟子員後博極羣書然不屑爲傳故訓詁尤熟掌故數之如村媪之道家當下至星輿醫卜之書靡不瀏覽咸豐末洪逆踞金陵分股四出川湖閩浙徧地賊蹤志城憤不卽滅爲策十二道凡萬餘言擬上當路

不果援輸餉例授光祿寺署正晉五品銜中年善病構廬於室之西偏題曰燭學廬自號灌園叟臥疾其間然藏書數萬卷多古今善本披吟著述迄彌留不輟卒於光緒七年年四十有八著有燭學廬詩草抱影軒文鈔惜陰閣時藝各四卷柳眠集詩餘一卷臆談課子約言地里擇要星學衍義等書

楊鴻時性好施剏設雙溪口渡船置有店房基地田數畝年收租

以傭渡夫人無病涉

廩生羅立權採

張光玉性好施捐修牛車河義渡置田數畝爲渡夫傭值其弟光

栢亦修角岩洲橋七磴行者稱便

監生張逢吉採

朱文明不惜千百金捐修千汊河屋橋兩河口石橋卒壽八十有

二 生員朱維翰採

郭恩秀倡修洞溪河義渡捐田數畝爲渡夫經費後因溪水湍急

舟不能濟添修石橋費款六百金不外募迨橋中圯始邀沅陵

龔姓協修入頌爲郭龔橋云

生員張藻鑑採

沈世香倡修殷家橋高岩磴毛家河橋屋行者便之

貢生張佐廷採

陳永昌捐田數畝分充楊氏坪古牛潭義潭經費遇有疲癯廢疾飲食衣服皆引爲己事親識待其舉火不下十數家鄉鄰稱焉

生員李

春暉採

陳德進字春浦歲貢生性詼諧與人無城府尤好施同里有斷炊者日中門未啟進負米拯之一鄉稱義後館邑紳周鳴鳳家疽發於背見者私吮之問其名不答而去其爲人感歎若此年五十七卒飭家人薄葬歛以常服子紹倬郡貢生孫燧邑廩生

曾毓達字碩彥歲貢生嘗客施南館某巨紳家歲暮解館歸夜宿逆旅聞鄰舍哭甚哀詢之逆旅主人則寡人子爲債家所迫將

驚妻達卽呼其人至詢所需幾何解囊贈之浮於其數俄而感謝者踵至則閉門堅臥叩其姓字不答甫辨色束裝行矣其好善樂施率如此年八十有三嘗自寫其像易簣時復題七絕二首一以自道一以詔其子孫云

魏榮採

羅振緒字恢先號飛仙篤內行與人不略設城府其父以寬席中人產坐仗義疏財落至振緒嘗無越宿糧操漁舟爲生族叔某豔府中趨以吏致富而艱於嗣冀振緒爲子有日矣適咸豐初齋匪禁嚴吏屬持郡守符向鄉民大索必破產厭谿壑乃已否則拘白於官置之法振緒惻然曰忍心至此甯餓不爲若子也遂逃歸復事故業上供菽水下課諸子耕讀乃漸裕而爽直重於鄉人有紛難得一言卽解五十七歲卒遠近聞者咸感歎泣下云以子潤璋貴

例贈文林郎

劉逢然採